

MU BWIKADI BWÈNDÈ



Twasàkidila, Mwanèètù Neville, Mukalenge àkubènèshè bibanjike menemene.

Ne mwoyi wènù awu dilòlò edi, balundà bàanyi. Edi ndyèsè dinènè dyà kwikalakù baalùkile cyàkàbìdì kaaba aka mu citanda emu dilòlò edi, ne tuumvwakù Bwikadi bwà Mukalenge wetù bütù kabùyi bupangika abu, bu mwàkafilàYe mulayi. Nènku mpindyewu, ndi mumanyè ne bàabúngì bàà kunùdì mbashààle muneemu bwà Diyishi dikesè dyà dilòlò edi edi, cìndi naaci ne kusàkidila kwàbúngì. Kàdi bàabúngì bàà kunùdì nebiikalè kàbìdì ne cyà kwendesha màshinyi kuya kule dilòlò edi, bwà kwalukila kumbèlu. Bakwàbò bàkaadi bamanè kuumuka ku bilààla-beenyi, mungümvù bàmba. Nènku netùteetè bwà kubènga kunùlama ntántà mule, nènku ki bwà cinyi tudi babwelè kumpàlà kwà dìbà bwà twètù kupàtuka kumpàlà kwà dìbà.

² Nènku mpindyewu netwikalè, pàndì ànu ne ngààpeci mùshindù, nèmmanyishè ne ndìbà kaayi ditwikalà pàmwàpa ne cyà kubanga, ndi mupetè ndambù wa mabiikila a ku téléfònè mu mapingaja emu, bamanyè dìbà ditwikalà mwà kubanga mikàndà eyi, anyi nshapità eyi. Ne ndi ngeela meeji ne, bu Mukalenge mwà kwanyisha, ndi muswè kwangata, musangu wàlondà wutwàbangà, pa Bitampì Mwandamutekètè byà Bwàkabuulwibwà, ne bitampì mwandamutekètè byà mu bufùki. Nènku, dìbà adi twètù bajikije pa dìbà, netwàngatè bitampì mwandamutekètè byà paanyimà pàà Mukàndà awu abi, nwamònu's. Mpindyewu, aci cìdi mwà kwangata ndambù wa dìbà. Nwamònu's, kùdi bitampì mwandamutekètè bìdì bikàngùdìbwe; kùdi bipùpù mwandamutekète, mpungi mwandamutekète, byònsò abi mwandamutekète mwandamutekete; ne bitampì abi mbitùdì bafwànyine kwangata dyàmbedi. Kàdi pashiishe paanyimà pàà Mukàndà mpakànga ne bitampì mwandamutekète. Danyèlè wakumvwa mèyi awu, mikungulu, ne bàakamukàndika bwà kuàfùnda. Yone, bàakamukàndika bwà kuàfùnda. Kàdi àvwa matwibwe citampì paanyimà pàà Mukàndà, mbwena kwamba ne, paanyimà pàà maalu masokoka ónsò a Mukàndà mamana kufdiibwa ne mamana kubuulula. Nudi bamòne ne Danyèlè mmwambè mwaba awu ne: “Maalu masokoka mu matùkù a mèyi aa, bwalu busokoka bwà Nzambi bìvwa ne cyà kuvùnguludiibwa ku ciinè cikondo aci.” Nwamònu's, “bwalu busokoka,” bwà ne Nzambi nganyi, mwàkavwijiibwàYe mubidi, bintu byònsò ebi bìvwa ne cyà kuvùnguludiibwa ku ciinè cikondo aci. Nènku dìbà adi—dìbà adi netwikalè badilongòlòle bwà Bitampì Mwandamutekète byà paanyimà pàà Mukàndà,

bìdì kabiyi nànsha bibuulwila muntu, kabiyi nànsha bifùnda mu Bible to, kàdì nebiikalè ànu ne cyà kupàlakajiiwà ànu menemene ne bikwàbò byà mu Bible, ne ndi ngeela meeji ne neciikalè cintu cinène.

³ Nènku mpindyewu netwikalè mwà kuteeta bwà kulwijakaka bwà kujikija. Tudi twela muntu ne muntu wa kunùdì twasàkidila bwà musàngeelu wènu ne diikalapù dyènù, ne—ne byònsò binùdì benzè, tudi tunwèla twasàkidila wàbùngì. Ne mpindyewu ndi—ndi mutwìshìbwe ne katwàkunùlama ntàntà mupitèpite bule dilòòlò edi to, bwalu nudi ne lutùulù lwàbùngì bwà kusòmba, kwimana kuulu. Mukàjàànyì ùvwa wàmba paanyimà pààpa, ùvwa wàmba bwà makèèlèlè dilòòlò awu, wàmba ne: “Mémè kumòna bakàjì bàvwa mene banènè bàà katankù, biimane kuulu mwaba awu, ne bilàmbà byàbò bibolè bolebole, biimàne kuulu mwaba awu, biikàlè bàbàkula ànu Dìyì dyònsò.” Ki bwà cinyi ntu muswè kushààla mu dilaabiibwa dyà Nyumà Mwimpè, bwà paùdì upàtuka wèwè kwambila bantu Bulelèlè bwà meeji matòòke, nwamònu’s, ne ànu Bulelèlè pa bwòbù. Nènku dîbà adi bàdì mwà kushààla pa Cyòci aci ne nebiikalè ànu bìmpè.

⁴ Mpindyewu ndi muswè kunùlòmba dilekela bwà katanci kakesè. Mvwa muumùke kumpàlà kwà dîbà ndambù mu dindà emu. Ne mikàbà yà mèyì mmiimanyika pa dîbà edi, ne mémè—mémè mu katanci emu nêngàmbilè bakwàci bàà mèyì pa mikàbà dîbà dyà kubangabò kukwàta mukàbà. Ndi muswè njikijè *Dibala Dyà Kwenda Kupingana Cyànyimà*, tusunsa tùtaanu bwà cyòci aci, kumpàlà kwà mémè kuumuka. Mvwa mupwè mwoyi kàdì kuya, mvwa ànu mwangàcike mu dindà emu mu mùshindù wà mupàtùke e kuya ncìyì ngamba kantu nànsha kàmwè pa bwalu abu to. Kàdì, mvwa munùshìile ànu pa ne: “Dibala dyà kwenda kupingana cyànyima ncinyi?” Nwamònu anyi? Ndi mumanyè ne tudi mu dibala dyà kwenda kupingana cyànyima, kàdì dibala dyà kwenda kwalukila cyànyima ncinyi? Nwamònu anyi? Wèwè kùyi mumanyè cidì dibala dyà kwenda kupingana cyànyima to, dîbà adi newikalè mu cibwejàkàjì mu mùshindù kampànda. Nènku ndi—ndi muswè ku—kucijikija, ànu, ne kuteeta bwà kwikala ànu mu cikèmù cìmwè cìmwà naaci bwà kujikija mukàbà wà mèyì ewu mpindyewu, bwà mukàbà wà mèyì kupàtukawù: *Dibala Dyà Kwenda Kupingana Cyànyimà*. Mpindyewu nwènù bònsò nenùmfwilèku luse ànu bwà katanci cyanàànà, nènku ndi muswè kujikija mukàbà wà mèyì awu. Nenùmfwilèku luse anyi bwà katanci kakesè cyanàànà, pashiishe túbangè mukwàbò? [Disangisha dìdì dyàmba ne “Amen.”—Muf.] Nènku mpindyewu—mpindyewu bakwàci bàà mikàbà yà mèyì, bu nwènù mwà kuswà, twàyaaku mbòta bwà kwendesha mukàbà wà mèyì mpindyewu. [Katùpà kàà mukàbà wà mèyì munda mutupù—Muf.]

[Mwanèètù Branham ùdì ùmvwija mu kasaka kii4 too ne ku kii5 ne yèyè ùvwa mukùmbàje katùpà kàvwà kapangike aka mu

diyiisha dyèndè dyà mu dindà divwà ne cyena-bwalu cyà ne: *Dibala Dyà Kwenda Kupingana Cyànyimà*, bu kasaka kàà 106 too ne ku kàà 111—Muf.]

⁵ Tufùmina ànu ku myaba mishiileshiiilàngàne, ne tudi bapicile mu cikondo cyà dicyònkomoka mu mayiisha àsàtù a ndekeelu awu, a dyakula pa cyena-bwalu cyà—cyà malongesha mashiileshiiilàngàne ne bikwàbò bitùdì batwàle. Ndi mfùma ku divùluka pa díbà edi ne bidi bikèngela mfilè kaamwaba kakesè muntwamu, nwènú bàdi bàtèèlejà mukàbà wa méyi bwà, bwà kushintulula mikàbà yènú yà méyi ayi. Nennwámбилè díbà dyà kwendesha bisanjì. Èyo. Mpindyewu, bikèngela ntangilè cyòci eci. Bidi bimwèka ànu bu mushiki wà bintu byenza byà kwísùkwisù, kàdi bikèngela bwà nsongàalùmè yàya yipetè mukàbà wà méyi awu. Ne kabèèna mwà kuwùpeta mwikàle wònsò mu cimvundù to; bóbò bawùpetè nàнку, bantu bàdi kwàka abu kabàakubyumvwa to. Pa nàнку bikèngela tucyàngàtè mu mùshindù ewu. Nèнку bu muntu mwà kupàtukakù mu cibambalu amu bwà kummanyisha kuntwaku, Junior, pàkaadìbo pabwìpi ne kushintulula mikàbà yà méyi apu. Twasàkidilaayi wabúngì, nwènú biinè, mùndì ngamba cyàkàbìdì, bwà musàngèelu wènú wònsò ne bikwàbò byònsò. Èyo, tudi pabwìpi mpindyewu, nudi mwà kuteemeshaayi bisanjì.

⁶ Mukalenge ànùbènèshè. Tudi ne disànkà dyà kwikala cyàkàbìdì mu tabernacle emu dilòòlò edi. Mwaba mmupàte patapata ne bantu bàabúngì biimàne cyàkàbìdì kuulu myaba yònsò dilòòlò edi, ne matùkù àsàtù a . . . anyì misangu yisàtù yà masangisha. Ndi muswè bwà ne muntu yéyè mutèèleje mukàbà wà méyi ewu, wàswakù kwalukila bwà kupeta mukàbà wà dilòòlò dyà ndekeelu. Nùwùlongèlaayi mu nzùbù yènú. Ncitupà cyà mpindyewu cyà mudimu wà bwambì wùdì Mukalenge mumpèeshe. Ndi muswè nangàngà bwà bambi bàteelejè cyòci aci kumpàlà kwà mémè kukùmbula èkèleeziyà yàbò ne kubwela mu nzùbù yàbò. Mpindyewu ndi muswè bwà bóbò ku—kupeta cyòci aci. Mpindyewu, mu dindà emu twakùlù pa *Dibala Dyà Kwenda Kupingana Cyànyimà*, Èkèleeziyà pabwìpi ne kuumuka.

⁷ Nèнку mpindyewu dilòòlò edi, bu Nzambì mwà kwanyisha, netwàkulè pa cyena-bwalu cyà *Mu Bwikadi Bwèndè*. Nèнку, kaa, mùshindù mwínè wutùdì twela Nzambì twasàkidila bwà dyèsè ditùdiku naadi bwà kumòna mwà kubwela mu Bwikadi Bwèndè's wè. Kàdi, dyàmbedi, ndi njinga bwà nùbuululè bònsò pàmwè naanyi mu Bibles yènú ku mupròfetà Yeshàayi, nshapitá mwi6 wa mupròfetà Yeshàayi. Tudi bònsò bamanyè ne Yeshàayi ùvwa mupròfetà munène, ne ùmwe wa ku bapròfetà banènè bàà mu ditùkù dyèndè. Wàkajikija wèndè mwoyi wà pànu mu dikòshibwa bitùpà bitùpà ne sí, bwà bujaadiki, bu mufwile diitabuuja bwà bukolè bwà Nzambì wa Bukolè bwònsò.

Mu Mukàndà wà Yeshààyi, nshapità mwi6, ndi mbangila ku mvensà mwi5, ne kubala. “Pashiishe mèmè kwamba ne: ‘Dyàkabi dyànyì!’ Bwalu . . .” Pàmwàpa ndi mbangila ku mvensà wa kumpàla. Anji mfwilàayikù luse bwà katanci kakesè. Tùbangilàayi ku mvensa wa kumpàla bwà kubala too ne kwìnshì lwà ku mvensà wa 8.

Mu cidimu cyàkafwà mfùmù Uzìyà ngàkamòna kàbìdì Mukalenge musòmbè pa nkwasa wa butùmbi, mutùmbùke ne mubàndisha kuulu, ne musùmbà wà paanyimà pèndè wùvwa muujè ntempèlù tètè.

Kumutù kwàci kùvwa kwimàne baselèfimà: yònsò mwikàle ne mapwàpwà àsambòmbò; ne àbìdì úvwa mubwìkile kwisù, ne ne àbìdì úvwa mubwìkile makàsà, ne ne àbìdì úvwa ùbùuka naawù.

Ne umwe úvwa wèla mukwèndè lubilà, wàmba ne: Wa cijila, wa cijila, wa cijila, m’MUKALENGE Nzambi wa bilwìlu: ne buloba bujimà mbùle tètè ne butùmbi bwèndè.

Ne makunji a ciibi àvwa ànyunga ku dîyi dyà úvwa wela lubilà awu, ne nzùbu wàkuula tètè ne mwìshì.

Pashiishe mèmè kwamba ne, Dyàkabi dyànyì! bwalu kwànyì kwàjiki; bwalu ndi muntu wa mishikù mibiipe, ne ndi musòmbèle munkaci mwà . . . bantu bàà mishikù mibiipe: bwalu mèsù àànyì àmònu Mfùmù, MUKALENGE wa bilwìlu.

Ki umwe wa ku baselèfimà kubùukayè ne kulwayè kùndì, mwikàle ne dikàlà dyà mudilu mu cyanza, dìwàye mwanjàte ne lukwàtù pa cyoshelu:

Ne wàkaditèeka pa mishikù yànyì, ne wàkamba ne: Mòna, eci nyewù cyàlengi mishikù yèbè; ne bubì bwèbè bùmùshùbù, ne mpèkaatù wèbè wàkezùdìbù.

Ngàkumvwa kàbìdì dîyi dyà Mukalenge, dyàmba ne: Nganyì úngàatùmà, ne nganyì wàya kaaba kètù? Dìbà adi mèmè kwamba ne: Mmèmè ewu; ntùmaanyì.

⁸ Mukalenge àbèneshekù Dìyi Dyèndè. Ngeela meeji ne awu m’Mufùndù wà wùtàmba kupapulangana. Tudi tusangana ne, mu Bwikadi bwà Nzambi, bantu bàdì bàdìjingulula bóbò biinè ne mbangènzàmpèkàatù. Tudi mwà kudyùmva bimpè be patùdì tusanganyibwa mu myaba mishìilèshìilàngàne, ne tudyùmva ne tudikù ànu bantu bimpè, kàdi patùdiku ànu tubwela mu Bwikadi bwà Nzambi anyì, dìbà adi tudi tumòna mutùdì bakesè.

⁹ Mvwa mwimàne ànu àbìdì aa ne—ne mulundà wanyì kampànda úmvwà mupetèku dyèsè dyà kulombola kùdì Kilistò, Bert Call, mu New Hampshire mwàmwa, mwena dyànyì wa mu bulembi, tuvwa biimàne pabwìpì ne cibila cyà Cold Brook

Falls mu mikùnà yà Adirondack mwàmwa, ne cívwa ncibila cinènè cyà dikèma. Mvwa muyè ne díkù dyànyì cidimu cishààle kuntwaku bwà kucibandila. Kule menemene ne njila, bikèngela bwà kwenza lwendu lule ku makàsà bwà kakùfika. Nènku patwàkamònà màyi a diikala dyà màyi a matàmbà ne a bleu awu àpòngoloka ne bukòlè bunène àfùmina mu mikùnà, ne icikidila pa mbwebwe, Bert ùvwa mwimàne mwaba awu muntàngile, kwambayè ne: “Kya, Billy, s’cìdi cìfikisha muntu ku didyùmvas mukesè *nùnkù’s*,” ùpima ne minu yèndè bunènè bwà millimètres yìsambòmbò. Kì mèmè ne: “Ncyà bushùwà, Bert.” Mpindyewu, ki cyònsò cívwayè pèndè mumanyè bwà dibwela dyà mu Bwikadi bwà Nzambi ncyòci aci, mu kumònà kwà bufùki Bwèndè.

¹⁰ Ndi ndikonka bwà muntu wàkafùnda *Mùshindù Mwinè Wùdi Munène’s Wè* awu, ní kàvwakù mutàngile muulu bufùkù kampàndà ne mutàngile mìtootò, mùdiyi yìsanganyibwa mu ntàntà mule! Kùkaadi ndambù wa ngondo, Mwanèètù Fred, Mwanèètù Wood ne mèmè, tuvwa biimàne ne Mwanèètù Mc Anally mu cipèèlà cyà mu Arizona mwàmwa, tuvwa tupima, tuteeta, mùtootò wùmwe, mùvwàwu pabwìpi ne mukwàbò. Miiakàle mishìilàngàne ntàntà wa kilòmèètà mìliyò ne mìlyaalà, kayìvwa yìmwèka bu mishìilàngàne ntàntà wa mupìte pa millimètres yìsambòmbò wùmwe ne mukwàbò to. Pashìishe twètù kubanga kwela meeji, bilondeshile cijaadiki cyà maalù a mamanya cyà cyòci aci ne, mìtootò ayi yìdi pàmwàpa mu ntàntà wùmwe ne mukwàbò mupìte ntàntà utùdi twètù naayi. Nudi numòna mùdi bwalu anyi?

¹¹ Pashìishe tudi tufika ku dijingulula mutùdi bakesè patùdi tufika ku dijingulula mùdiYe Yèyè munène, ne mutùdi tuseemena pabwìpi patùdi tulwa mu Bwikadi Bwèndè. Mu mùshindù kampànda, cikaadi misangu yònsò ànu cyènzè cikùmà cinènè pa bantu pàdìbo bàbwela mu Bwikadi bwà Nzambi. Nkààdikù mumòne cikondo mu mudimu wànyì wà bwambi cyùdi mufwànyine kumòna Bwikadi bwà Nzambi bùlwa mu mùshindù wà ne mbifwànyine kuseemeja muntu ne kumusokolwela ànu nsòmbelu wèndè, ne kwela patòòke mpèkaatù yèndè yà mishindù yònsò yà byenzedi byà nsòmbelu wa masandi, ne ciikàle citwàla cinyàànyà cyà cijila munkaci mwà bantu mu mùshindù wà bafwànyine kupàtuka mu mulongo wà babèèdi kumpàlà mene kwà kuseemenabò bwà kubàsambidilabò, ne kulwa lubilu ku cyoshelu ne kudìlongolola kumpàlà kwà Nzambi kumpàlà kwà kubwela mu Bwikadi Bwèndè. Nwamònu’s, kùdi cintu kampàndà pa bìdi bìtàngilà kubwela mu Bwikadi bwà Nzambi, cìdi cyènza ne maalù ènzekè. Nkààdikù mumòne bantu balààle mu tulààlù twà dibùnya ne tulààlù twà dyambwila babèèdi.

¹² Dilòòlò adi ku Mexique kwàka, pàvwa mwànà mukesè mufwè awu mulààle mujìngila mu mbùlankète apu, uvwàbò balwè nendè kùdi maamù mutekète wa beena Espagne awu, anyì maamù mutekète wa beena Mexique’s wè, mulwè nendè.

Pàakamònàbo, bantu binunu byàbûngi bamòne, pàmwàpa binunu makùmi àtaanu anyi makùmi mwandamutekètè ne bitaanu mu disangisha òmwèpelè, bamòne mwànà mukesè wa mu dibòko awu mubiike ku lufù, bakàji bààkuuminyina, bantu bààkeela byanza byàbò muulu bèèla mbilà mikolè. Bwà cinyi? Bààkajingulula ne muntu wetù ewu kàvwakù mwà kwenza aci to, ne bàvwa bàsanganyibwa mu Bwikadi bwà Nzambi wa Bukolè bwònsò. Cyàkafikisha cintu kampànda ku dyenzeka.

¹³ Nkààdikù mupetè dyèsè dyà kuumvwa bantu bàà difwàna dyà Nzambi bàakula. Bààkambakù musangu kampànda bwà Charles Finney, muntu mukesè wa meneme, kàyikù mwà kwikala ne bujitu bupite pa kilò makùmi àtaanu to, kàdi ùvwa ne mùshindù kampànda wà bukolè wà kwakula mu mùshindù wà ne. . . Ùvwa ùteeta bipàtudi bya mèyi dîngà ditùkù mu citanda kampànda. Kabàvwa ne ndongolwelu yà mèyi musangu awu to. Kàdi kùvwa muntu kampànda ùlongolòla, kuulu ku cisàsà, anyi kuulu mu musàkà wà nzùbu awu, nènku kuumvwayè muntu awu ùbwela, kàdi kàvwa mumanyè ne ùvwa nganyi to, kushààlayè ànu mupùwe. Nènku Mukalenge Finney ùvwa ùkèba kuteeta bipàtudi bya mèyi abi. Paanyimà pàà mumanè kupicishila dîbà dyàbûngi mu kusambila bwà ditàbuluja òvwàye ne cyà kwenza adi, kuteetayè dîyi dyèndè bwà kumòna mùvwadi difwànyine kuya. Kudifindayè lubilu mu cyambilu, e kwambayè ne: “Nyingàlalaayi, bwà cyanààna nudi nubùtuka!” Nènku wàkacyàmba ne bukolè—bukolè bwàbûngi paanyimà pàà mumanè kwikala mu dilaabiibwa dyà Nzambi, mu mùshindù wà ne muntu awu wàkapòna kuumukila pamutù pàà cisàsà aci, e kudikùmayè panshi, anyi, kuumukila mu mùsongà wà nzùbu aku, kudikùmayè panshi.

¹⁴ Kuyiishayè Èvànjeeliyò mu mùshindù wà ne wàkiimana mu Boston, Massachusetts, mu kaadididiishi kàà kalòpòke mu cimano, bwalu kakùvwa èkèleeziyà nànsha umwe uvwa mwa kukùmbana musùmba wèndè awu to. Ne wàkiimana mwaba awu ne bukolè bwà dikèma, ne wàkayiisha ifernò mu mùshindù wà ne, bantu bàvwa bàkwàta mudimu ne bitungà mu mápà, bààkadishinda mu misèsù bèèla mbilà mikolè bàlòmba luse. Mu Bwikadi bwà Nzambi’s! Bayiishi banènè bàtù bamanyè, ku Diyì dyà Nzambi, mwà kutwadila batèèleji Bwikadi bwà Nzambi abu. Kabyènzekikù to bwà bantu bafwànyine kwikala bapapè munda mwa myoyi yàbò mu mùshindù wà kabàyikù mwà kujingulula Bwikadi bwa Nzambi to. Kabùikadikù nànu nànsha!

¹⁵ Muntu wa kumpàla, mmwenzè ànu wènza mpèkaatù ne mwenzè cintu kampànda cyà cibi, ne pàakabwelà Nzambi mu bwikadi bwèndè, anyi, pàakabwelayè yèyè mu Bwikadi bwà Nzambi: “Adàmà,” yèyè kàvwa mwà kwimana mu Bwikadi bwà Nzambi to. Wàkanyeema ne wàkasokoma mu kaacipuka ne wàkateeta bwà kudibwikila dibèji dyà mfigi, bwalu wàkamanya ne ùvwa mwimàne mu Bwikadi bwà Yehowàh, Mufùki awu.

Acì ncìvwà dibinduluka dyà muntu wa kumpàla, paanyimà pàà yèyè mumanè kwenza mpèkaatù ne muteetè bwà kubwela mu Bwikadi bwà Nzambì mwikàle ne mpèkaatù pa musùukà wèndè. Kàvwakù mwà kusokoma to, bwalu ùcìvwakù ne mwoyi mutekète. Mpèkaatù kàvwa mukwàte mùkaadiye mwelè miji mu myoyi yà bantu leelù ewu emu to, kàdi yèyè ùvwa mumanyè ànu menemene ne ùvwa mwimàne kumpàla kwà Mufùki wèndè. Mpindyewu, wàkasokoma mu bisuku ne kayi muswè kupàtukamù to, ne kàvwa mwà kupàtukamù to too ne pàakamulongolwelà Nzambì cintu kampànda.

¹⁶ Tudi bafwànyine kwalukila, ne kwangata mu Genèsè nshapità wa 17 ku mvensà mwi3 aku, pàvwà nkambwà munène awu, Abraham, pàakabwelàye mu Bwikadi bwà Nzambì, ne Nzambì kwakulaYè nendè (mu nshapità wa 17) mu Dìna dyà Nzambì wa Bukolè bwónsò, Abraham kupòna kutwà mpàlà panshì. Nkambwà munène awu, musadidi wa Nzambì, kàvwakù mufwànyine kwimana mu Bwikadi bwà Nzambì to, nànsha mùkaavwàye muMusadile munda mwà bidimu makùmi àbìdì ne bitaanu amu, ne lulumatu lwónsò. Kàdi pàakabwelà Nzambì mu bwikadi bwèndè, nkambwà awu wàkapòna kutwà mpàlà panshì bwalu kàvwa mufwànyine kwimana mu Bwikadi bwà Nzambì to.

¹⁷ Mu Ekèsòòdè 3, tudi tusangana ne Mòsà, musadidi munène ne mupròfetà wa Nzambì awu, pàvwàye mu ndekeelu mwà cipèèlà mwàmwa apu, muntu awu ùvwa muntu wa cijila. Ùvwa mulediibwe mu kiipàcilà aku. Ùvwa mulela kuumukila ànu munda mwà mamwèndè bwà kwikalayè mupròfetà. Wàkateeta bwà kupeta dilonga dyèndè dyà tùlaasà ne kwenza byónsò bìvwàye mwà kwenza bwà kusungila cisàmbà cyèndè, bwalu wàkumvwa ne yèyè nguwva ne cyà kusungila cisàmbà cyèndè, kàdi, mpàvwàye mucyũmvwè ku mmwènenenu wa tèòlòjì. Ùvwa mulongèshiiibwe. Ùvwa mulongesha tùlaasà bilenga byà dikèma. Ùvwa mwà kulongesha beena Èjipitù lungènyi, bòbò bàvwà bantu bàà batàmbe kwikala bàà meeji matwè bàà pa buloba abu. Ùvwa mumanyè byónsò munda ne pambèlu. Ùvwa mumanyè Mifùndu kuumukila ku A too ne ku Z. Ùvwa mumanyè milayì yivwà Nzambì mufile. Ùvwa mubìmanyinè ku mmwènenenu wa mamanya a mu mutù. Ne ùvwa muntu mu—munène mu maalu a búsàlaayi. Kàdi dīngà ditùkù lwà mu ndekeelu mwà cipèèlà mwàmwa, pàakabwelàye mu Bwikadi bwà Nzambì, wàkakòpola bisàbaatà ne wàkapòna panshì—ku makàsà èndè, mumanyè ne ùvwa ùsanganyiiibwa pa buloba bwà cijila. Kàvwa mwà kushààla mwimànyine kuulu to pàakabwelàye mu Bwikadi bwà Nzambì apu, wàkapòna kutwà mpàlà panshì mwàkenzà Abraham amu. Kàvwakù mwà kwimana kuulu mu Bwikadi bwà Nzambì to.

¹⁸ Mu Ekèsòòdè 19.19, pàvwà cisàmbà cisungula cyà Nzambì acì kubangila kale wàwa mu matùkù a Abraham, ku Abraham kulwakù Izàkà, ku Izàkà kulwakù Yakòbò, mu Yakòbò

kupàtukamù bankambwà, ne paanyimà pàà bidimu ne bidimu bantu bàà cijila kupàtukabò, bantu banène, cisàmbà cisungula, cisà cisungula, cisàmbà cijidila, cyà cijila, bàvwà basadile Nzambì mu nsòmbelu wabò. Nènku dīngà ditùkù Nzambì kwambaYè ne: “Sangishà Izalèèlà kaaba aka, Mèmè nēngàakulè naabò.”

¹⁹ Kàdi pààkatùulukà Nzambì pa lusongo lwà Mukùnà wà Sinaayi, ne mukùnà mujimà awu kukwàtawù kapyà, ne mwìshì wùvwa wùbùùkapù byenzè bu cikùtù cyà kapyà, ne Dìyì dyà Nzambì kukunguladì, Izalèèlà kupònabò kutwà mpàlà panshì e kwambabò ne: “Mòsà àkulè yèyè, kàdi kí n’Nzambì to, bwà katwikadi twálwa kufwà.” Muntu, mu Bwikadi bwà Nzambì, ùdi ùjingulula ne ùdi ngènzàmpèkààtù! Pààbò’s, yònsò wa kùdìbo, bàvwa batengula bilondèshile Mikenji. Bàvwa bakùmbàjè mèyì matùma ne bikwàbò byònsò, kàdi pààkaakulà Nzambì ne kuseemenabò mu Bwikadi Bwèndè, bààkajingulula ne kabàvwa cintu to, kabàvwa—kabàvwa bajaalàme to, kùvwa cintu kampàndà cìvwa cipangike, bwalu bàvwa mu Bwikadi bwà Nzambì. Eyowà. Ki kwambabò ne: “Mòsà àkulè yèyè, kàdi kí n’Nzambì to, bwalu Nzambì Yèyè mwakùle twètù bònsò netùfwe. Mòsà àkulè yèyè neetù.”

²⁰ Mùvwa mmu Luukà 5.8, pàvwà Peetèlò . . . kaa, pàvwàye muntu munènè wa mutù mukolè, ne muntu wa bwenzeji bunène, bukolè bunène mutùdì tuumvwa. Úvwa bu mpomba, mulòbi wa mishipa mumanya bimpè. Kàdi pààkamònàye cishimà cyà Nzambì cyenza kùdi Muntu ànu wetù wa pàtupù ewu, mùvwàbi bimwèke’s, bu mùvwàye mujingùlùle pa dībà adi ne bìvwa bikèngela kampànda wa mutàmbe muntu bwà kwela mishipa yònsò ayi mu bukòndò bùvwàye yèyè, ne dilonga dyèndè dyònsò dyà tulaasà, dimanya dyèndè dyà bulòbi adi, mulòbe naabù bufùkù bujimà abu kàyi mukwàte kantu to. Kàdi yèyè kuumvwa Muntu kampàndà wàmba ne: “Elà bukòndò bwèbè abu.”

²¹ Nènku pààkabangàye kukòka, kukwàtayè mishipa bùngì cyanàànà, ki kufikayè ku dijingulula ne ùvwa muntu mubiipe. Kì yèyè ne: “Nguumùkilèku apa, Éyì Mukalenge, bwalu mèmè’s ndi muntu mubiipe.” Wàkamba aci nganyi? Peetèlò Munsantu’s, mu Bwikadi bwà Nzambì, ùlòmba Nzambì bwà kuumuka mu bwikadi bwèndè yèyè, bwalu wàkafika ku dijingulula ne ùvwa ngènzàmpèkààtù.

²² Abraham wàkajingulula mùvwàye yèyè mwinè “mupiile.” Adàmà wàkajingulula mùvwàye yèyè mwinè “mupiile,” pèndè mwànà wa Nzambì, kujingululayè mùvwàye yèyè mwinè “mupiile.” Mòsà wàkajingulula mùvwàye yèyè mwinè “mupiile.” Izalèèlà, bu èkèleeziyà ne ditunga, bààkajingulula mùvwàbo bòbò biinè “bapiile.” “Nguumùkilèku apa, bwalu ndi muntu mubiipe.” Yèyè kààkateeta kwamba ne: “Mpindyewu, mèmè ndi wa cijila ne mukùmbànyine kwakidila cyòci eci” to. Wàkamba ne: “Mèmè ndi muntu mubiipe.”

23 Musangu kampànda mulongi kampànda wa maalu a ntèndeleelelu muditu wa mènà, mwikàle ne tèlòlji yónsò uvwayè mwà kuyiila ku makàsà kwà mulongeshi munène kampànda uvwabò bàbìikila ne n'Gàmalièlè awu, dyèndè Shawulà wa ku Taashishi, utùdì bamanyè ne m'Pòlò awu, mutèndeleeedi wa mu ùmwè. Úvwa mumanyè kaalu kónsò kàà mu ntèndeleelelu wabò. Úvwa Mùfaalèsà wa ku Bàfaalàsà, ne mwena Ebèlù wa beena Ebèlù. Úvwa muntu mumanya bìmpè, mumanyi wa dibàla, wa meji matwè, mudimùke, mulongè tùlaasà, wàmba mùvwàye mumanyè Nzambì kacya ku bwànà. Kàdi dínghà ditùkù mu njila mutàngile ku Damàsèkè, Dikunji dyà Kapyà adi dyàkamuteemena ne yèyè wàkadishinda ku èndè. . . ku makàsà èndè, panshi, mu lupwishi, ne wàkamba ne: “Mukalenge, Udi muswè bwà mèmè kwenza cinyi?” Dilongeshiibwa dyèndè dinène dyónsò adi, dilongeshiibwa dyèndè dinènè dyénsò dyà tèlòlji adi, kàlaasà kèndè kónsò kalonga aku kakààkiikalakù ne mushinga to pààkiimanàye mu Bwikadi bwà Nzambì.

24 Ndi njinga kwimanakù ndambù kaaba aka bwà kwamba ne ncintu cimwècimwè aci. Udi mufwànyine kwikala mupetè màpòlomè a D.D., Ph.D., cyónsò cyùdì mufwànyine kwikala aci, udi mufwànyine kwikala mùyaayàye mu èkèleeziyà kacya ànu ku bwànà, udi mufwànyine kwikala mwenze byenzi byónsò byà butèndeleeedi bìdikù abi, kàdi paùdì ànu ufika mu Bwikadi bwà Nzambì neudyùmwè mukesè ne kùyi ne mushinga to.

25 Pòlò wàkajingulula ne ùvwa mupiiile, ne wàkadishinda panshi, ku bwenzeji ne Bukolè. Pàakabàndulukàye e kumòna Nzambì mwinè uvwayè ùyiisha awu, ne. . . ùlwisha, ne ùdyàmbidila mùvwàye mumanyè awu, ne kumònayè ne yèyè nguvwa mupiiile, wàkadishinda panshi mu malaba, bwalu ùvwa mu Bwikadi bwà Nzambì. Wàkamòna Dikunji dyà Kapyà adi.

26 Kàdi bìshi bwà Yone Munsantu munène wa mu Bwàkabuulwibwà 1.7 awu, pàakamuleejàbo cikèenà-kumòna aci, ne kutàngilayè, ne kuumvwayè Dìyì dyàkula nendè? Ki kukùdimukayè bwà kumòna Dìyì adi, e kumònayè bitèekedi byà myèndù byà ngòlò mwandamutekète. Ne Kampànda ùvwa mwimàne munkaci mwà bitèekedi byà myèndù byà ngòlò mwandamutekète abi, ne nsùki myenzè bu myòsà yà mùkòòkò, ne mèsù bu ndimì yà kapyà, makàsà bu makunji a cyamù cyà kabanda, Úvwa ne mukàbà wà ngòlò muswika pa cyàdi, ne Úvwa ùbìikidiibwa ne n'Dìyì dyà Nzambì. Kàdi pèndè Yone Munsantu munène awu's wàkendà ne Kilistò, kuMweyemena mu cyàdi, pààkenzàye bintu byónsò ebi! Mùngàmbì mu dindà emu ne, mudimu wà bwambi wà Pòlò wùvwa mutàmbe kule ne kule wà yónsò wà kùdibo. Mwaba ewu, paanyimà pàà Yone mumanè kwenda ne Yesù, mwakùle Nendè, mulààle pàmwè Nendè, mudyè Nendè, kàdi pààkaMumònàye mwimàne mwaba awu, mu ngiikàdilù mutùmbishiibwe awu, kwabayè ne wàkapòna

ku makàsà Èndè bu muntu mufwè. Amen. Anji elààyibì pèènú meeji pa bwalu abu!

²⁷ Tudi mwà kulwa mu èkèleeziyà ne kwakala ne kutùmbisha Nzambì, ne bikwàbò, kàdi, kaa, mwanèètù, patùdì tuMumòna ùlwa apa, cintu kampànda neciikale cishiilàngàne mu myoyi yètù! Tudi bafwànyine kwela meeji ne tudi tukùmbaja mudimu wètù wà butèndeledi mu kuya kwà mu èkèleeziyà ne kufuta kwà byàdiikùmi byètù. Tudi bafwànyine kwela meeji ne tudi tuneemekela mikenji yà èkèleeziyà ne twambulula ku mwoyi twitabàayi yònsò, kàdi twànji ànu tùMutàngilè musangu wùmwèpelè, cintu cyònsò nkòong cidi cishintuluka ku nseke yònsò. Eyowà's, ncyà bushùwà.

²⁸ Muntu munène ewu, Yone Munsantu, muntu munène mùshindù awu, Bible mmwambè mu Bwàkabuulwibwà 1.7 ne, “wàkadishinda byenzè bu ne ùvwa muntu mufwè.” Paanyimà pàà bidimu bisàtù ne citùpà byà bwobùmwe ne Kilistò, yèyè wàkalwa umwe wa ku bafùndì bàà Mikàndà mitùminangana ayi, mufùnde bwà bwalu Bwèndè, mudyè Nèndè ku mèèsà, mulààle pàmwe Nèndè mu bulààlù, ne mubwelè Nèndè mu bwobùmwe kwònsò kùvwàYe ùya, kàdi pàakakùdimukàye bwà kuMumòna, kàkashààla kàbìdì ne mwoyi munda mwèndè to. Wàkadishinda panshì bu muntu mufwè, anyi mu malaba. Èyo.

²⁹ Tudi tumòna Yeshàayi, mu Yeshàayi 6.5, bu mutwàfumu ku dibala, mupròfetà munène wa bukolè ewu, yèyè ngumwe wa ku bapròfetà bàà batàmbe bunène bàdiku mu Bible. Kùdì Mikàndà makùmi àsambòmbò ne yisambòmbò yà Bible; kùdì nshapità makùmi àsambòmbò ne yisambòmbò mu Yeshàayi. Yeshàayi ùdì ùbangila mu Genèsè, munkaci mwà Yeshàayi yèyè ùdì ùbweja Dipungila Dipyadipyà, ku ndekeelu wà Yeshàayi yèyè ùdì ùbweja Bukalenge bwà bidimu cinunu; ànu Genèsè, Dipungila Dipyadipyà, ne Bwàkabuulwibwà menemene. Bipwàngàne! Yeshàayi ùvwa umwe wa ku bapròfetà banène. Kàdi dǐngà ditùkù yèyè ùvwa mweyèmene pa dibòkò dyà Uzìyà mfùmù munène awu, Uzìyà wàkuumushiiibwa kùdiye, ne yèyè wàkashààla ne dibungama. Ùvwa muntu mwímpè be, ùvwa muntu mwímpè ne mwakàme, piikalàbi ne mfùmù mwakàne awu (mfùmù mwímpè) wàkajingulula ne ùvwa muntu wa cijila ne wàkamulama mu ntempèlù wèndè.

³⁰ Yeshàayi ùvwa ùmòna bikèèna-kumòna. Ùvwa mupròfetà. Yeshàayi ùvwa ùyiisha Díyi. Ùvwa mwambi. Yeshàayi ùvwa muntu wa cijila. Kàdi dǐngà ditùkù, yèyè mwimàne mu ntempèlù, wàkabwela mu nyumà ne wàkamòna Butùmbì bwà Nzambì. Wàkamòna Banjèlo biikàle ne mapwàpwà majìke kwìsù Kwàbò, mapwàpwà mabwikile pa makàsà Àbò, bàbùuka ne mapwàpwà, bèèla mbilà ne: “Wà cijila, wa cijila, wa cijila m’Mukalenge Nzambì wa Bukolè bwònsò!”

³¹ Mupròfetà awu wàkajingulula ne ùvwa cintu cyanaàna. Yéyè kwamba ne: “Dyàkabi dyànyi, bwalu ndi muntu wa mishikù mibiipe.” Mupròfetà, mupròfetà mutàmbe bukolè wa mu Bible, umwe wa kùdìbo. “Ndi muntu wa mishikù mibiipe, ne ndi musòmbèle munkaci mwà bantu bàà mishikù mibiipe. Dyakabi dyànyi, bwalu ngàmònu Butùmbi bwà Nzambi.”

³² Ne mmwambè ne, pàakeelà Mwanjèlo awu lubilà, “makunji a ntempèlù àkanyunga àtwa kumpalà àtwa paanyimà.” Mwanèètù, aci's necikuvwijè. . . Ki ng'anu makunji a ntempèlù ìkalà mwà kunyunga to, kàdi mauu ònsò ne buloba nebinyukushibwè pàalwàYe cyàkàbìdì. Mikùnà neyinyeemè, ne mbù neàjiminè, ne neèlè lubilà lukolè ne: “Tùsokòkèku kumpalà kwà Ewu ùdi musòmbè pa Nkwasa wa butùmbi awu.” Neciikalè cikondo cyà cikwàcisha bwòwà. Ndi nkwabwila, wèwè mulundà wanyì ngènzàmpèkààtù, mbìmpè ùkenketè bwalu abu. Ncyà bushùwà.

³³ Mpindyewu, Yeshàayi wàkamba ne: “Dyàkabi dyànyi, ndi muntu wa mishikù mibiipe, ne ndi musòmbèle munkaci mwà bantu babiipe. Ne ndi, bantu aba bàdi ne mishikù mibiipe.”

³⁴ Mpindyewu vùlukàayi ne, piikalàbi ne bantu bàà cijila bàà mùshindù awu bààkajingulula mùvwàbo “bangènzàmpèkààtù” mu Bwikadi bwà Nzambi, ngènzàmpèkààtù ne udi kàyi ùneemeka Nzambi nebènzè cinyi mu Dìtùkù adi? Bantu bàdi basòmbè mu masangisha aba nebènzè cinyi? Bantu bàdi bamòne Bukolè bwà Nzambi aba nebènzè cinyi, bàdi batèèlèje dibala dyà kwenda kupingana cyànyimà pa Dìyi aba, bàdi bamòne Nzambi ùDimwènesha, ne (kakùyi mpatà nànsha mikesè to) Mufùndù ne Mufùndù wònsò mùle, kàdi biikalè ànu bàteeta bwà kuya mu Dyulu kabayi balediibwe cyàkàbìdì ne bapetè Nyumà Mwìmpè aba? Bible mmwambè ne: “Biikalà muntu mwakàne ùsùngidiibwa ne lutàtù, ngènzàmpèkààtù ne udi kàyi ùneemeka Nzambi nebàshaadilè penyì?” Mmu mwaba wà mùshindù kaayi wutwikalà mwà kwimana patùdi tumòna Nzambi ùDisokolola kumpalà kwètù mene, ne tumòna Butùmbi bwà Nzambi ànu menemene mwàkamòna bantu abu amu, ne bantu bàà mùshindù awu bààkeela mbilà mikolè, bapròfetà ne beena meeji bàdi Dìyi dishindamijila pa bóbò abu? Piikalàbi ne bóbò abu bààkeela mbilà, ne kupòna panshi, ne bèela mbilà mikolè ne: “Ndi muntu wa mishikù mipangè cijila, yà bukooya,” nebìikalè cinyi dibà adi bwà muntu awu udi kàyi nànsha muswè kutonda mpèkaatù yèndè? Nebiikalè cinyi bwà nsongàalùmè anyi nsongàakàji awu udi kàyi muswè kutonda mpèkaatù yèndè? Nebiikalè cinyi bwà muntu wa mwoyi wà cipàtu awu udi udyàmbidila mùdiye mumanyè bufùki bwà Nzambi kutamba mùdi Nzambi Yéyè mwinè mumanyè awu? Cyènzekelà muntu awu ncinyi udi mupicishe matùkù èndè ònsò a mwoyi mwikalè ùteeta kujaadikilangana mùdi Bible wa mafi? Muntu awu neàshaadilè penyì? Anji elàayi meeji pa bwalu abu!

³⁵ Eci mbutangadiki. Eci ncikondo cyà kunyùkusha bantu. Eci ncikondo cyàkambà Nzambi ne nekùlwe cikondo, Yèyè wàkanyùkusha Mukùnà wa Sinaayi musangu kampànda kàdi kùlwalwa cyàkàbìdì dinyùkushiibwa, ne Yèyè “kayi ùnyùkusha ànu Mukùnà wà Sinaayi to, kàdi Yèyè neànyukushè byònsò bìdì bifwànyine kutentemunyiibwa.” Kàdi nuvwakù bamòne cikwàbò citùpà cyà Mufundu awu aci anyi? “Kàdi twètù tudi tupeta Bukalenge bùdì kabùyì mwà kunyungishiibwa nànsha!” Àlèluuyàh! Byònsò bìdì mwà kunyungishiibwa nebinyukushiibwè. Maulu neànyukushiibwè. Buloba nebùzakalè. “Maulu ne buloba nebijiminè, kàdi Dìyì adi kadyàdyàkujiminakù to. Bwalu pa lubwebwe elu Nèngìbakilèpu Èkèleeziyà Wanyi, ne biibi byà ifernò kabyàkuMutàmbakù bukolè to.” Byònsò bìdì mwà kunyùkushiibwa nebinyukushiibwè. Kàdi twètù tudi tupeta Bukalenge bùdì Dìyì dyà Nzambi Yèyè mwinè, ne Nzambi ùdì Dìyì Dyèndè. Kèna ùDinyùkusha Yèyè mwinè to. Amen! Kaa, ekèlekèlè! “Kàdi twètù tudi tupeta Bukalenge bùdì kabùyì mwà kunyungishiibwa nànsha,” kabùyì mwà kunyukushiibwa to, mùdì Pòlò mufùndì wa Ebèlù awu mwambè.

³⁶ Muntu wa mùshindù awu ne mulùme wa mùshindù awu, cikondo cyà mùshindù awu ne mùshindù mwinè wàkadyùmvwàbo's wè! Tudi kàbìdì, twètù biinè, tudi badimwène Butùmbì bwà Nzambi ànu mwàkadimwènà bantu aba amu. Bushùwà's. Tukàadi baBùmòne. Tudi bamòne Butùmbì bwà Nzambi ànu mwàkaBùmònà Abraham amu. Tudi bamòne Butùmbì bwà Nzambi ànu mwàkaBùmònà Mòsa amu, Nzunji dyà Kapyà dimwèdimwè adi, Bukolè bùmwebùmwe bwà Nzambi abu, Kilistò umwèumwè udi-. . . udibuulula Yèyè mwinè awu, ùdileeja Yèyè mwinè, ùshààla mukwàte ku Dìyì Dyèndè mu ditùkù dyà ndekeelu. Mmunyì mutùdìku dìbà adi mwà kulwa kaaba aka, ne kwenda ne kuDyàngata ne mapepelela nànkù awu? Mmunyì mutùdìku mwà kwendakana eku ne eku bashààle kacya twakwàta ku twitabàayi yètù ne màngumba ètù, katùyì twangata Dìyì dyà Nzambi? Nebiikalè cinyì bwètù twètù mu Ditùkù adi? Nebyènzèkè munyì bwètù twètù, patùdì bamòne Butùmbì bwà Nzambi?

³⁷ Bàmwè bantu bàdi biimanyina pa bule biikàle bàBwèlulwila, bàmwè bàBùseka, bàmwè bàdi bàBùbiikilè ne ndikolesha dyà maalu, bàmwè bàBùbiikila ne ndubùkù, bàmwè bàBùbiikila ne m'Beelèzèbùlà, bàmwè bàBùbiikila ne ncikampànda anyi ncikansanga. Mùdì nsumwinu yà kale myambè ne: “Bakùtākàne nebèndelè ne bisàbaatà byasa misonso muntàku mwaba wùdì Banjèlò bàcìina bwà kudyata.” Ncyà bushùwà's. “Mukùtākàne mmwambè munda mwà mwoyi wèndè ne: ‘Kàkùtùkù Nzambi to.’” Pàdiye ùmòna Nzambi mumwènèshiibwe ànu menemene ku Dìyì Dyèndè Sungasunga (kakùyì ku twitabàayi kampànda to; kàdi ku Dìyì Dyèndè),

kàdi díbà adi yéyè ùDyidatakaja ku makàsà ne ùDyèlulwila, s'mmukùtākàne. Bwalu, bidi ne, Nzambi ùdi Díyì, ne Nzambi mmuDivwìjè kùdìye mutòòke tòò, kàdi yéyè “mmukùtākàne,” mùdi Bible mwambè. Nebiikalè cinyi bwèndè yéyè pàakèngelàbi bwà kwimanayè mu mwaba awu? S'nebiikalè—s'nebiikalè bibi be bwà muntu awu mu Ditùkù adi, udi kàyì ùneemeka Nzambi awu.

³⁸ Bangènzàmpèkààtù bàdi banyingàlále kaayi, bóbò, kabèèna ne bwòwà nànsha bukesè to. Kaa, to. Ngènzàmpèkààtù wányingalala awu, yéyè mmumanyè ne kùdi Mulàmbù wa mashi mwindile, bwà kwangatawù kaaba kèndè. Ki cidi cimpèsha mèmè busàmbi ncyòci aci. Mèmè nkààdi mumòne butùmbi bwà Nzambi. Nkààdi muumvwè bukolè Bwèndè. Ndi mumanyè dindenga dyà cyanza Cyèndè. Ndi mumanyè dindenga dyà dinyooka Dyèndè. Ndi mumanyè ne Yéyè ùdi Nzambi. Ne ndi mumanyè ne ndi mucimùnyìibwe, kàdi kùdi Kampànda mwimàne mwaba awu pa kaaba kàànyì. Amen. Kùdi Kampànda udi mwimàne mwaba awu wàmba ne: “Taatu, elà bubì bwèndè bwònsò abu pambidi Pàanyi, bwalu yéyè wàkangata kaaba Kàanyi pa buloba.” Àlèluuyàh! Díbà adi ndi nya ku Nkwasa wa butùmbi wa Nzambi, ne dikima dyònsò, mwikàle ne ngàsà mu mwoyi wanyi, bwà kumanya ne kí nku byenzedi bìmpè to, kàdi nku luse Lwèndè kùndi musungìdìibwe. Kí ncindi mèmè mufwànyine kwenza, cìndi mufwànyine kashààla wa ku cyòci, kí ncìndi mufwànyine kwamba to; kàdi nku ngàsà Wèndè kùdiYe munsungile.

³⁹ Kabyèna bikèmesha to pàvwà mwedi wa kasàlà wàkabàkula aci awu, mwelè lubilà lukolè ne: “Ngàsà udi ukèmesha, díyì dipòle kaayi, dyàkasungilà mukèngeledi wa luse bu mèmè. Kale wàwa mvwa mujìmine, kàdi mpindyewu ngààpetèki; mpofò, kàdi mpindyewu ndi mmòna.”

⁴⁰ Mmuniyì mùndiku mwà kuya mu Dyulu? Mmuniyì mùdiku mufwànyine kuya mu Dyulu? Katwèna mwà kucyènzakù to, twètù aba, ne kakwèna mùshindù wà twètù kucyènza to. Kàdi kùdi Kampànda wàkasebela njila. Ne Yéyè ngudi Njila awu. Kàdi mmuniyì mutùdi tufika kùdiYe? Ku Nyumà umwe, Nyumà Wèndè, nkutùdi babàtiijìibwe mu Mubidi wùmwe wàbiishiiwà ku lufù bu mpoko. Netùpatukè mu buloba bu babàndi bàà mu mabùlungà bàà ditùkù dyà ndekeelu edi mu diitabuuja dyà Nzambi. Amen. Bushùwà's. Bangènzàmpèkààtù bàdi banyingàlále kabèèna ne bwalu bwà kulubakaja meeji to, Kampànda ùdikù pa kaaba kààbò.

⁴¹ Kaa, díbà adi paanyimà pàà twètù bamanè kubwela mu Bwikadi Bwèndè mpindyewu, ne bamanyè ne tuvwa mu Bwikadi Bwèndè, tudi baMumòne wènza bintu byàkenzàYe pàvwàYe pa buloba apa. Mmuniyì mùdi umanya. . . Mmuniyì mùdi umanya ne cyùdi mutàngile aci mmwonjì wà mvinyò? Mbwà mamuma àdiwu wùkwàma. Mmuniyì mùdi umanya èkèleeziyà ùdi uyamù

awu? Nku mamuma àdiye ùkwàma. Yesù wàkamba ne: “Ewu udi ungiitabuuja Mémè, byenzedi biNdi ngenza yèyè neàbyénze pèndè. Bimanyinu ebi nebi filè bàdi biitabuuja.”

⁴² Mpindyewu, tudi tumòna ne Yèyè kààkatùtùminakù díyì bwà kuya kenza màngumba to. Kààkatùtùminakù díyì bwà kuya kenza twitàbàayi to. Kàdi Wàkatùdìmwija ku byà nànkù. “Bwalu ewu yònsò wadìdinga kuumushilaKù kantu anyì kuKùsàkidila kantu awu, cintu cimwècimwè aci necyùmushiibwè, cyàbò citùpà, ku Mukàndà wà Mwoyi.” Nwamònu anyì?

⁴³ Nènku, twètù katwèna ne díyì ditùtùmina dyà kwenza cintu nànsha cimwè to ànu kushààla ne Díyì adi. Nènku muntu yèyè mutùmiibwe kùdi Nzambì, neàshaalè ne Díyì, bwalu Nzambì ùdi mwà kutùmangana ànu ku Díyì Dyèndè. Nwamònu anyì? Nwamònu’s, Yèyè udi ne cyà kushààla ku luseke lwà Díyì Dyèndè. Dìbà adi patùdi tubwela mu Bwikadi Bwèndè, pàdi ànu muntu ùbwela mu Bwikadi bwà Nzambì, yèyè mmushintùlùke kashidi, piikalàbi ne kùdikù dishintuluka kampàndà kùdiye aku. Mpindyewu, kùdi aba bàdi bafwànyine kubwela mu Bwikadi bwà Nzambì kàdi kabàyi bàtèyaKù ntèmà to. Awu kàvwa mulongolwela Mwoyi to. Kàdi yèyè mudyànjila kulongolola kùdi Nzambì, pàdi ànu kaamuswakeenu kàà kumpàla aku kàmulenga, yèyè ùdi ùkàmanya. Aci cidi cyumba cikwàta kapyà.

⁴⁴ Tàngilaayi ndumbà mukèsè awu kuntu kwaka ditùkù adi ku Sàmaalèyà, mukàji awu. Ùvwa mu mùshindù mubì mu meeji ne mu mubidi. Aci tudi bamanyè. Kàdi mmwenzè ànu ùmòna cimanyinu aci cyènjiibwa, cyà Maasiyà aci, yèyè ne: “Twètù tudi bamanyè ne Maasiyà ngulwàlwa bwà kwenza eci. Wèwè udi ne cyà kwikala mupròfètà Wèndè.”

Yèyè ne: “Mémè ki Maasiyà wàkafùndabò ne nealwe awu.”

⁴⁵ Kucijingululayè. Kààkeelakù lukwàbò lukonko nànsha. Kubangayè ne lùkàsà lwònsò kwambula bujitu bwèndè, bwà kumanya ne piikalàbi ne yèyè ùvwa mupetè aci ne mubwelè mu Bwikadi bwà Nzambì, ùvwa mwambulè bujitu bwà kwambila muntu mukwàbò bwalu abu. Àlèluuyàh! Cyà bushùwà’s. Muntu kanà yònsò ewu udi ubwela mu Bwikadi bwà Nzambì mmwambulè bujitu kumpàlà kwà Nzambì, kubangila ànu mu kasunsa aku, bwà kwambila mukwàbò muntu. Tàngilàayi Abraham, tàngilàayi Mòsà, tàngilàayi Peetèlò, tàngilàayi Pòlò. Dìbà dyàkabwelàbo mu Bwikadi bwà Nzambì, bààkadìjingulula bòbò biinè ne “mbangènzàmpèkààtù,” ne bààkatwà citampì ku bujaadiki bwàbò ne mwoyi wàbò. Tàngilàayi inàbànzà mukèsè awu, kàvwakù mwà kushààla kàbìdì ntàntà mule to, wàkaya mu cimenga e kwambila bantu balùme abu ne: “Lwàyi, kanùmonàayi Muntu wàngambidì bintu bìndì mwenzè. Ewu kí m’Maasiyà awu anyì?” Kabàvwakù mwà kuCìvila to, bwalu

Civwa cyà mu Mifundu. Bushùwà's. Èyowà, bàdi ne cyà kwenza nàнку, muntu mulùme, patùdi tupeta bujiti bwà dyambula bwà kwambila bakwàbò mwàkenzà Mòsà amu, mwàkenzà Peetèlò amu, mwàkenzà Pòlò amu. Paanyimà pàà maalu aa, wèwè waCimònu ne wàbwedì mu Bwikadi Bwèndè, wèwè udi mwambùle bujitu bwà Mukenji bwà wùfikè kùdi mukwàbò muntu. Kwèna ànu mwà kushààla mubùcike naaWù matàma to. Udi ne cyà kuWùfikisha kùdi mukwàbò muntu.

⁴⁶ Ndi mvùluka mwanèètù wa bakàji mukùlàkàji kampànda uvwa mwab'ewu kale wàwa, mamwèndè wa Mwanètù Graham Snelling, ùvwa ne ciibidilu cyà kusòmba ànu mu èkèleeziyà emu mene, ne ùvwa wimba ne: "Ndi mfùma ku dicimuna! Ndi mu lubilu, mu lubilu, mu lubilu, ne mfùma ku dicimuna, ne ncyèna mwà kushààla musòmbè to." Ùvwa ùfùma ku dipeta cintu kampànda. Mvwa muyè ku kaèkèleeziyà kakesè kàà bafiike lwà mu Louisville emu, ne bwònsò bwàbò bàvwa biimanyine kuulu, bimba ne: "Ndi nyeema mbànda ne Cibeeba cyà Mfùmù, ndi mfùma ku diCìpeta, ne mudìtwe mu Cibeeba aci!"

⁴⁷ Kùdi cintu kampànda pa bwalu abu, pàudi upeta Kilistò, kwèna mwà kushààlakù kàbidì mupùwe to. Matùkù èbè ònsò a mwoyi udi muntu mushintùlùke, bwalu pàdi mwoyi ne Mwoyi bìdisanga, bìdi byèza Bukènkè bukolè. Bulelèlà. Pàdi mwèndù wà nzembu ùtwàngana ne nshinga wà nzembu, wòwò mwikàle mwèndù wà cyà bushùwà, wùdi ne cyà kufila bukènkè; pàdi nzembu ne mwèndù awu bipetangana, kawèna ne cyà dyenza to ànu kutangalaja bukènkè. Bùdiwu naabù nkwenza nàнку. Ne pàdi mulùme anyi mukàji mudyànjila kulongolwela Mwoyi wà Cyendèlèlè, ne ùmòna mùdi nzembu yà Nzambi yibàkula mwèndù awu, newùtumè Bukènkè myaba yònsò yidìwu mwà kutùma ayi. Wèwè udi mufwànyine kwikala kùyi mupite pa watts dikùmi to, kàdi neùtangalajè Bukènkè bwònsò bùdi naabù abu. Wèwè kùyi wa watts nkàmà yitaanu to, tangalajà Bukènkè bwà watts dikùmi. Fila wèwè ànu Bukènkè bwèbè abu! "Bukènkè bwènu bùkenkeshè kumpàlà kwà bantu, bwà bàmonè byenzedi byènu bìmpè ne bàtumbishè Taatù udi mu Dyulu." Èyowà's, mukalenge.

⁴⁸ Pàdi muntu ùtwàngana ne Nzambi, ùdi ùdìjingulula ne "kèna mwìmpè to." Mmunyi mùdiku muntu mwà kutwà eku kutwà eku ùditàmbisha mùdiye munènè ne byònsò bikaadiye mwenzè, pèndè cintu cyanààna? Kèna ne bwà nsongo to twamb'eku twamb'eku. Dìngà ditùkù mu Memphis, mu Tennessee, anyi mu wùmwe. . . Ncyèna ngeela meeji ne mùvwa mmu Memphis to. Wùvwa ngùmwe wà ku myaba ayi. Tuvwa ne Mwanèètù Davis ne tuvwa twenza di—ditàbuluja. Mùvwa mufwànyine kwikala mu Memphis. Nènku tuvwa, tuvwa bayè ku cipalu kampànda cyà manàyi, ne bavwamù ne, kacivwa cipalu cyà manàyi to, civwa bu nzùbù wa dileejila mpingù, nènku bàvwa ne mpi—mpingù minène yivwàbo naayi mifùmìne ku

bitùpà bishiilèshiiilàngànè byà buloba, yà mishiilèshiiilàngànè, ba-Hercules ne bakwàbò, yivwà bazòdi banènè bàà bimfwànyì bazòle. Ki pashiishe kwenzabò ditaata dyà muntu uvwa ne bujitu bwà kilò makùmi àsambòmbò ne mwandamukùlù. Nudi bamanyè mùdì bwalu anyì, yèyè ùvwa ne mushinga kaayi? Tuumeeyà makùmi mwandamukùlù ne tùnaayi. Ki cyònsò cìdìye. Tuumeeyà makùmi mwandamukùlù ne tùnaayi ki mushindà wònsò—wònsò wùdiku mwà kupeta mu yèyè. Ùdi ànu ne lupèmbà lutòòke búngì bukùmbàne bwà kumyamina mu ciswa cyà nzòlò, ne ùdi ne búngì bukùmbàne, ànu ndambù mukesè cyanààna wa kàlisiyumù, ne tuubinshidimba tukesè. Twònsò atu ntufwànyine kusùmbishiibwa ku tuumeeyà makùmi mwandamukùlù ne tùnaayi. Kàdi twètù tudi tukùba ànu tuumeeyà makùmi mwandamukùlù ne tùnaayi atu ne tutwèngeleka's.

⁴⁹ Kùvwa nsongàalùmè yìbìdì miimàne mwaba awu, ewu kutàngilayè mukwèndè, kwamba ne: “Jim, katwèna ne mushinga mwìnè to, s'mmwòmò's?”

Awu ne: “Wà kwèpi's, katwèna naawù to, John wa yààya.”

⁵⁰ Mémè kwamba ne: “Kàdi anjì indilaayi kakesè, nwènù nsongàalùmè, wèwè's udi ne musùkà munda amu wùdì ne mushinga wà malaba binunu dikùmi, wùdì, wùdì mwà kupikudiibwa ku bukòlè bwà Nzambi, bu wèwè ànu mwà kubùlekela.”

⁵¹ Muntu, pàdiye ùmòna bintu ebi, mmwambùle bujitu bwà kwambila bakwàbò. Mémè ngákacimòna pàncivwà ànu mwànà mutekète. Ntu mupìcishilekù mwoyi wanyì mujimà. Ndi nyingalala mùndì naawù ànu wùmwèpelè, ndi njinga bwà ngìkalakù naayi binunu dikùmi's. Bu ne mvwakù ne Cyendèlèlèlè, mvwa mufwànyine kwikala ànu ncyàmbila bantu, bwalu ki cintu cyà citàmbe bunène cìndiku mupetè. Bu nwènù mwà kubala mu Yèhezèkèlè 33, nshapità wa 33 wa Yèhezèkèlè, kùvwa nsentedi uvwa musòmbe pa cibùmbà, ne nsentedi awu ùvwa mwambùle bujitu bwà cimenga cijimà aci. Amen. Mpindyewu, tàbulukàayi, ditàbulùjaayi nwènù biinè ku kondò kèènù kàà mwoyi kàà nyumà bwà katanci kakesè aka, pàndì mfika ku Mufundu ewu apa. Bivwa bikèngela bwà nsentedi awu kwikalayè muntu mulongesha. Bivwa bikèngela kwikalayè mumanyè cìvwayè wènzà, bwalu mu ntàntà kanà yònsò, pàvwàbò ànu ne bàjuukù, mwena lukunà awu's, yèyè mufwànyine kucitandula. Ùvwa mufwànyine kumanya mùshindù wàbò wà dyenda, ùvwa mufwànyine kumanya diikala dyàbò, ùvwa mufwànyine kumanya ndongamu wàbò ne milongo yàbò. Ntàntà yònsò uvwa mèsù a muntu mwà kumòna awu, yèyè ùvwa mufwànyine kucimòna. Ne yèyè ùvwa mutùmbùke kutàmbe bakwàbò bònsò, bwalu ùvwa mulongesha bwà kumanya mwena lukunà awu. Ne Nzambi ùvwa ùlòmba cimenga cijimà aci ku cyanza cyèndè. “Nsentedi, udi wamba bishi bwà bufuku?” Àlèluuyàh!

⁵² Mùshindù awu ngùdi màsálaayi a Nzambi leelù ewu. Mmalongeshiibwe ku Díyi. Pàdi ní ncinyi ní ncinyi cidi ne ndambù wa kapelu cijuuka, ciikàle ne cintu cikhwàbò kampànda cyà kacyi cyà mu Mifundu, yèyè ùdi ùdimwija disangisha dyèndè. Cintu kanà cyònsò cidi kacyi cyà mu Bible to, cintu kanà cyònsò cidi kacyi—cidi kacyi ne mmwènekelu wa Nzambi, bu mùdi kudyà kwà byàkudyà byà nsupù, maja, ne bikwàbò byònsò, bwà kufuta mpaasàtà. Bintu abi mbibi. Manàyi a mubèlè ne manàyi a twartà mu màèkèleeziyà, mbibi! Nénku nsentedi mulelèlè pa cimanu, ukààdikù mufikè mu Bwikadi bwà Nzambi awu. . . Yèyè kàyi pa cimanu to, piikalàye ànu ne mbamanyè ne yèyè ùdi pa cimanu, cimanu cidi mwà kubènga kwikala citumbùke kutàmba bakwàbò beena disangisha. Kàdi yèyè mwikàle nsentedi mujaalàme, Nzambi ùdi ùmubàndisha too ne mu bipaapu mùdi bakwàbò kabàyikù mwà kufika to. Kàdi yèyè ùdi ùtàngila cisumbù cyà mikòòkò, ne Nzambi ùdi ùcilomba kùdiye yèyè! Mulumè wa Nzambi ùdi wimana mu Bwikadi bwà Nzambi, ne mumanyè ne Nzambi ùdi Nzambi, ne mumanyè ne Nzambi ùtu ùshààla mukwàte ku Díyi Dyèndè, ne ùtàngila mùdi Nzambi ùDikwàcila ne ùDyènzela mudimu ne ùshààla mukwàte ku Díyi Dyèndè, díbà adi nànsha malongolodi anyi màngumba búngi kaayi àteeta bwà kuCyùpula, yèyè mmumanyè ndongamu ne milongo yà mwena lukunà awu. Amen. Yèyè mmumanyè cyà kwambila disangisha, nsentedi mulelèlè awu.

⁵³ Twètù bajikùle ne Yèyè ùdikù, biikàle mu Bwikadi Bwèndè, ne batondè mpèkaatù yètù, yòyi's yidi yikùpudiibwa mu mukànda wà civùlukilu Cyèndè. Kakwèna muntu nànsha umwe udi mwà kwenza aci to pa kuumusha Nzambi. Mpindyewu, wèwè udi mwà kungenzela cintu kampànda, nènkufulwèlè luse, kàdi nèngiikalè ncivùluka. Mèmè mukwenzèle wèwè cintu kampànda, udi mufwànyine kumfwila luse, kadi newikalè ucivùluka. Kàdi Nzambi ùdi mwà kucifwà luse ne kucipwa mwoyi. Elàayibi meeji ku bwalu abu, “kàyikù nànsha mene ùcivùluka to!” Amen. Aci cidi cyèenza ne ndyũmvwèku bìmpè. Pàdici kaciyikù nànsha mwà kuvùlukiibwa kàbìdi to, cintu nànsha cimwè kaciyèna mwà kucyèenza to pa kuumusha Nzambi. Cintu nànsha cimwè kaciyèna mwà kwenza aci to pa kuumusha Nzambi. Yèyè mmwambè ne neÀcikipulè mu mukànda wèndè wà civùlukilu. Mèmè ncyèna mwà kucyèenza to, wèwè kwèna mwà kucyèenza to, bwalu tudi ànu ne tuubyumvwilu tukesè tùdi ne mikàlù etu. Kàdi Yèyè kèna ne mikàlù to, Nzambi awu, kaktùyi mpatà to Yèyè ùdi mwà kupwà ne mwoyi ne cyàkenjiibwakù. Amen.

⁵⁴ Nsongààkàji kampànda wa citende mufùmìne ku èkèleeziyà wa ku musòkò, ne tatwèndè ùvwa muiishi wa cyenakale, mwedi wa mbilà, anyi cidimba cyà èkèleeziyà awu. Ki nsongààkàji ewu kumwangala kuya mu cimenga, kàdi kubwelakananganayè bikolè ne bakàji bàà muntwamu, ne kushààlayè úkaadi wèza maalù mùvwàbo bòbò bènza amu,

ne myòdelè. Ki dîngà ditùkù kudyùmwayè bundù bwà papa wendè ne maman wendè bwà kulwabò, anyi tatwëndè's we, èyo, mamwëndè ùkaavwa mufwè. Pa nàнку mukùlumpè awu, cintu cìmwèpelè cìvwàyekù mufwànyine kwenza, nkujuuka mu dinda, kudyà cyàkudyà cyèndè cyà mu dindà ne kwangata Bible ne kuMubala, ne kwela mbilà ne kusambila ditùkù dijimà, ne kunyeemakanangana eku ne eku mu cibambalu amu, ki nsongààkàjì awu kuumvwayè bundù ndambù bwà cyòci aci. Ki dîbà adi—dîbà adi pàvwà dîbà dyònsò dyà bufùkù bujimà adi, yèyè ànu mutwè cyanza pa Bible anyi, ùvwa ùbanga kuMubala, ùvwa ùjuuka mu bulààlù, wèla lubilà ne: “Butùmbì kùdì Nzambì! Àlèluuyàh! Kaa, butùmbì kùdì Nzambì's wè!” Mwikàle ànu ùtwa mikùmà wèla mbilà cyàbibidì cijimà cyà bufùku.

⁵⁵ Kwenzekabì ne dîngà ditùkù ùvwa ne cyà kucyònkomojakù beena mu èkèleeziyà wabò ne kaafetè kakesè kàà cyayi mùtùbo bènta misangu yònsò amu, nudi bamanyè's, nènku kàvwa mumanyè cìvwàye mwà kwenza ne papa wendè awu to. Twamb'eku twamb'eku, yèyè awu's nguvwa papa wendè. Nènku kupàngadikayè bwà kumutèeka peewulu mu cisàsà, kwambayè ne: “Papa, kî mbîmpè wikalè mwaba wùdì bakàjì aba to, s'mmwómò's?”

Yèyè ne: “To, ncyèna ngeela meeji ne ndi muswè kwikalapù to.”

⁵⁶ Yèyè ne: “Èè, netwikalè mwà kwakidila bakàjì bàà mu èkèleeziyà kaaba aka leelù ewu, ne netwikalè mwà kwenza kaadisangisha kakesè, kaadisangisha kakesè kàà milòmbò. Pa nàнку ndi—ndi nkwambila's, papa, bwà cinyi kwènàku ànu ubànda mu cisàsà mwàmwa?”

Yèyè ne: “Ngeela meeji ne ànu aci ki cîngènzà.”

⁵⁷ Ki awu ne: “Wikalè ubala mukàndà mulenga ewu.” Ki kumupèeshayè mukàndà wà maalu a buloba. Kuumushayè Bible wendè awu kùdìye bwà wàshààlakù mupùwe. Nènku ùvwa mumanyè ne yèyè mubalè Bible, mòna's, ùvwa mufwànyine kuditwa mu dyenza dyà mutooyi bûngì cyanàànà kuulu aku. Nènku ùvwa ànu kuulu aku kumutù kwabò, nudi bamanyè's, mwaba wùvwàbo bènzela kaafetè kààbò aku awu. Ki kumupèeshayè mukàndà wa maalu a buloba, kwambayè ne: “Ewu ngùdì mulenga. Ki wùvwà wùkèngela bwà wèwè kubala, papa, bwalu wùdì wùkwambila bulelèlè bwònsò pa bidì bitàngilà buloba.”

“Kaa,” mwàkambàye, “nèngìikalè ne disànkà dyà kubala abi.”

⁵⁸ Ki yèyè ne: “Mpindyewu bànda kuulu aku ùshaalèku mupùwe ànu menemene too ne pùumukà bakàjì aba, ne pashìshe nèngìikalè. . . nètuulukè panshi ne dîbà adi udi mwà

kwenza cyônsò cyûdi muswè.” Kwitabayè bwà kwenza nàнку. Ki kubàndayè pa cisàsà apu, kupàsòmbayè.

⁵⁹ Nèнку bôbò bàvwa bônsò munkaci mwà kwenza kaafête kàà cyayi aku, nudi bamanyè's, bàyiikila pa *bikampànda ne bikansanga*, ne nutu ànu bamanyè mùtùbi byènzeka amu, bàpicila mu cikondo cyônsò cyà dicyònkómoka aci. Kàdi lwà pa díbà adi cintu kampànda e kusùulukaci peewulu apu, mikunda ne ditùpika, ne byà ku cimanu bimata. Mukùlumpè awu nguvwa unyeemakana ùbànda ùpweka pa cisàsà cijimà apu ne mwèndè mwônsò, ùtùpika ùya muulu wàlukila, wèla mbilà ne: “Butùmbi kùdi Nzambi! Butùmbi kùdi Nzambi's wè!” Bakàjì abu kabàvwa bamanyè ne civwà cyenzèke kuulu aku ncinganyi to, ncinyi civwàbò naaci kuulu aku. Ki dyàkàmwè kutùulukayè panshi apu, ùlwapù ne dikànda ne mwèndè mwônsò.

Nsongààkàjì awu kwambayè ne: “Papa, s'vwwa mukupèeshe mukànda wà maalu a buloba bwà ùbalè.”

⁶⁰ Yèyè ne: “Èyowà, ndi mumanyè nàнку. Udi mumanyè's,” yèyè ne, “Mvwa mbala mu mukànda wà maalu a buloba ewu mwaba wùdi myaba mu mbù yìdi kayìyi ne ndekeelu to.” Ki yèyè ne: “Mvwa mubalè mu Bible emu makèèlèlà awu, Yèyè mwambè ne mMwelè mpèkaatù yànyi mu 'mbù wa cipwàmwòyi.' Butùmbi kùdi Nzambi's wè! . . . ? . . .” Yèyè ne: “Yicidi ànu yènda yìya's. Kayèèna ne ndekeelu to, yìdi ànu mitùngùnùke yènda yìya.” Ncyà bushùwà. Nèнку ùvwa wèla mbilà bwà cyôci aci. Èè, ncyà bushùwà's.

⁶¹ Nzambi ùdi wèla mpèkaatù yètù mu mbù wa cipwàmwòyi, ùyikùpula, ne yìdi ànu bu ne kacya kayitukù myenzèke to. Kaa, èkèkèkè! Díbà adi tudi biimàne kuulu ku ngàsà wa Nzambi, ku Yesù Kilistò Mukalenge wetù, bakezùke ne bàà cijila, bàà cijila ànu mùvwàYe Yèyè amu, bwalu Yèyè kèna ùmmòna mémè pàndi mfika kuntwaku to, Udi ùmòna Mwàn'Èndè Sungasunga awu. Mùshindù wùmwèpelè wùdiYekù mwà kumòna . . . kèna mwà kummònakù mémè to, bwalu ndi munda mwà Mwàn'Èndè. Ne Yèyè ùdi ùmòna ànu Mwàn'Èndè awu. Abi kì mbilenga bilayà anyi? Kabyèna bikèngela bwà twètù kwikala twela kàbìdi meeji ku mpèkaatù to, yònsò mmiyè, yidi mwìnshì mwà Mashì. Èyowà's, mukalenge. Katwèna ne cyà kutàcisha kàbìdi meeji pa bwalu abu to, yònsò mmyumusha, ne myumusha mu civùlukilu cyà Nzambi. Kàcyèna nànsha ùyivùluka kàbìdi to.

⁶² Yeshàayi, mupròfetà wa bukolè awu, pààkatondàye mpèkaatù yèndè, wàkamba ne: “Dyàkabi dyànyi, bwalu ndi muntu wa mishikù mibiipe.” Mupròfetà! “Ndi muntu wa mishikù mibiipe, ne disangisha dyànyi ndikooyike.” Nwamònu anyi? “Bantu bândi nyiisha, mbakooyike. Mémè ndi mukooyike. Nèнку dyàkabi dyànyi. Kàdi ki musumbà wà Banjèlò ewu bàpwekà bàfuma mu Butùmbi bwà Nzambi, bàkùpa ma—matutu paanyimà, ne ndi ntàngila muulu mmòna mùzàbi Wèndè mùje

Dyulu dijimà. Ne ndi ntàngila Banjèlò bàtù kacya kabàiyikù bamanyè ne mpèkaatù ncinyi abu. Kacya kabàvwakù nànsha bamanyè ne mpèkaatù ncinyi to, ne mwômò amu, mu Bwikadi bwà Nzambi amu, biikàle ne mapwâpwâ àbidì mabwikile kwìsù, bàvwa ne mapwâpwâ àbidì mabwikile makàsà, ne bàbùùka ne mapwâpwâ àbidì, ne bàdi bèèla mbilà muunya ne bufùku ne: “Wa cijila, wa cijila, wa cijila m’Mukalenge Nzambi.” Yoyòyò. Aci’s ncifwànyìne kukufikisha ku didyùmvwà ànu bu udi kùyi wa cijila, kì mmwômò anyi? Mpindyewu, cyàkenzàye ncinyi? Wàkamba ne: “Dyàkabi dyànyì.”

⁶³ Kàdi pààkatondàye mpèkaatù yèndè ne kwamba ne “dyàkabi dyànyì,” Mwànjàlò wàkaya kangata lukwàtù, kwambula dikàlà dyà mudilu dìvwà dìleejà Nyumà Mwìmpè ne Kapyà, ne wàkalwa ne wàkaditèèka pa mishikù yà mupròfetà, wàmba ne: “Nyawù Ngààkukezùlù.” Dìbà adi mapwâpwâ awu àtuuta *nùnkù* ewu, kuumushawù rìdò yà cikondo, kì kuumvwayè Nzambi wàmba ne: “Wàya kaaba Kèètù nganyì?”

⁶⁴ Kàdi paanyimà pàà yèyè mumanè kujandula ne kùvwà mùshindù wà kuumusha mpèkaatù, Nzambi ùvwa ùkèba bwà muntu kampànda kuyayè pa kaaba Kèndè, kì yèyè ne: “Mmémè ewu, ntùmaaku.” Ukaavwa mu Bwikadi bwà Nzambi, ne mumanè kutonda mpèkaatù yèndè, ne mukezùdìibwe ku mpèkaatù yèndè, ne mudìlongòlòle bwà mudimu. Amen.

⁶⁵ Mwedi wa kasàlà pààkabàkulàye cyòci aci, wàkamba ne:

Miliyò mpindyewu mu mpèkaatù ne bundù kì
kufwàbo eku,
Tèelejà mwadi wàbò wà dibungama ne
kànjabàla;
Kolèshàku, mwanètù, kolèshàku ùye
kabàsùngila;
Andàmùnàku ne lùkàsà lwònsò ne: “Mfùmù,
mmémè ewu.”

⁶⁶ Pàndi ngeela meeji ku Àfrikè, ku Inde, ne mu buloba bujimà, miliyò yà bampàngaanù bèèla mbilà mikolè bàdila myadi yà bàlòmba luse, kàdi wàya nganyì? Kì nkubàpèèsha kabèjì kàà kubala to, kàdi kubàtwàdila Yesù Kìlistò. Muntu kampànda mu Bwikadi Bwèndè, bu Mòsà, uvwa mwà kuya kuntwaku ne kubàleeja disùngidiibwa dilelèlè. Kì nkubàfikisha ku diya kashààla bàà mu èkèleeziyà, anyi ku dilabulangana dyà ku cyanza ne dyambulula dyà twitabàayi to, kàdi kutwàdila musùùkà wàbò disùngidiibwa; muntu kampànda mwìmpè wa difwàna dyà Nzambi. Èyowà, Yeshàayi wàkatonda mpèkaatù yèndè ne wàkakezudiibwa.

⁶⁷ Paanyimà pàà Yakòbò mumanè kulwangana mvità yà bibùlà bufùkù bujimà, mu kutonda kwà mpèkaatù yèndè, nudi bavùlùke mwaba wùvwàye ùsanganyibwa awu anyi? Wùvwà wùbiikidiibwa ne Peniel, P-e-n-i-t-e-l, Peniel. Mwakù *Peniel*,

mu cyena Ebèlù, mbwena kwamba ne “mpàla wa Nzambi wa Bukolè bwónsò.” Yakòbò, kenji kàà maalu makònyàngàle kàvwà kànyeemà kwónsò. . . dìnà dyèndè divwa *Yakòbò*, mmùmwè ne “munyèngi wa myaba yà bendè,” mmumwè ne mudingyanganyi, ùvwa munyeemènyèème matùkù èndè ónsò a mwoyi, ùnyeema Nzambi, kàdi musangu kampànda pààkabwelàye mu Bwikadi bwà Nzambi ku Peniel, ku mpàla kwà Nzambi, wàkapyà Nzambi kàcìyi muswè kuMulekelela to. Nzambi, bìdi bitùkèngela ba-Yakòbò bakwàbò. Wàkanànukila ku mpàla kwà Nzambi, mu Bwikadi bwà Nzambi, wàkashààlamù too ne ku dipàtukà dyà dìbà. Nzambi kwambaYè ne: “Ndekèlè Nye, bwalu dìbà nya’ dikaadi dipàtuka.” Kàdi kushààlayè ku mpàla kwà Nzambi too ne ku dipàtuka dyà dìbà, kàdi wàkuumuka mubingishiibwe ne musùngìdìibwe. Huh.

⁶⁸ Kaa, cintu bunène kaayi cìvwàci’s wè, mpindyewu, cyà kumanya ne yèyè wàkalwangana mvità yà bibulà too ne ku ndekeelu’s. Mbwena kwamba ne, ùkaavwa mumònemòne bimanyinu byà Nzambi, ùkaavwa mumònemòne Nzambi mu bilòòtà, kàdi ewu musangu kaayi ùvwakù musangànyìibwe ku mpàla kwà Nzambi, mu Bwikadi bwà Nzambi. Anjì elààyibi meeji pa bwalu abu, nwènù balundà bàanyi. Mpindyewu, patùkaadi tulwìjakaja apa. Mu Bwikadi bwà Nzambi, muntu mmushintùlùke. Yakòbò wàkashintuluka. Bwà mpindyewu kaayi ùvwakù mwà kwenda ne Nzambi. Èyowà’s, wàkalwa muntu mushilàngàne ne uywayè pààkayàye kuntwaku apu. Mvità mpindyewu yàkajika. Èyowà’s, mukalenge. Ki kubangayè kwibaka cyoshelu. Kàvwakù mwibidilàngàne ne diibaka dyà yoshelu to, nudi bamanyè’s. Kàdi, ndi nzwàmbila ne, paudi ufika mu Bwikadi bwà Nzambi, udi ujinga kwibaka cyoshelu mwaba kampànda. Udi ujinga kupetaku mwaba kampànda wùdi mwà kusambidila. Yèyè wàkiibaka cyoshelu. Ùkaavwa mukezùdìibwe, ne Nzambi ùkaavwa mucimùne.

⁶⁹ Ne Yakòbò wàkashintuluka kuumuka ku *Yakòbò*, “munyèngi wa myaba yà bendè,” kuya ku *Izàlèlèlèlè*, “mwànà wa mfùmù, mwikàle ne bukòòkeshi pàmwè ne Nzambi.” Ki cìvwa cyenzèkèle Yakòbò ncyòci aci. Munyèngyanganyi wa myaba, mudingyanganyi, mubi, ukàyì cijila, mudingyanganyi, mudingè mwanaàbò, mwibè bwanààbutè, mutùdi mwà kwamba, kùdi mwanaàbò, mwangàte kaamùshindù kakesè kàà bukooyà kàà dicyenza, mudingyanganyi wa dikèma. Wàkadinga tatwèndè-wenu. Kutèeka tuumici twà cilòmbàlòmbà e kwenza twànà twà ngombe twà makejimizeji, pàvwà ngombe ne difù yìlwa mwab’awu, yikàtàngila kaamuci aku, ne mikòòkò. . . yìvwa yimòna kaamuci kàà makejimizeji aku nènku yilela twànà twà makejimizeji, ùtùpèèsha makeji à cileledi. Mudingyanganyi, ùdinga tatwèndè-wenu sungasunga. Mudingè mamwèndè, mudingè papa wèndè, mudingè mwanaàbò, kàdi mmwenzè ànu ùbwela mu. . . Yèyè ùvwa mwenji wa maalu makònyàngàle.

Ùvwà ùnyeema myaba yònsò yìvwàye ùya, misangu yònsò ànu ùnyeema Nzambi, ùvwà munkaci mwà kunyeema mwanààbò. Kadi pààkabwelàye mu Bwikadi bwà Nzambi, wàkajingulula ne ùvwà ngènzàmpèkààtù. Wàkenza cinyi? Wàkenza cinyi? Wàkamòna wèndè mpùngà. Wàkatwilangana ne cintu civwàye kàyi nànsha mwelèlekù meeji kwònsò aku to, ne wàkashààla mwaba awu too ne pààkuumukà mpèkaatù yònsò kuyayi. Kaa, ekèlekèlè! Nzambi's wàkamupetela mu Bwikadi Bwèndè Sungasunga.

⁷⁰ Nzambi ùtu ùlongolola mùshindù wà kupetela bantu mu Bwikadi bwàbò, díbà adi bàdi bàngata dipàngadika. Bàmwè bàà kùdìbo bàtu bàMunyeema, bàmwè bànyeemena kùdìYe. Bòbò badyànjila kulongolwela Mwoyi, bàvwà bàCìitabuujà, bàshààla bakwàteKù. Kabìyi nànkù to, bàdi bàteeta kuumuka bàmba ne: “KaCyèna ne bwà nsongo to.” Nwamònu anyi? Nènku ki muntu udi mujimine nyèye awu. “Muntu udi utonda mpèkaatù wèndè, neàfwidiibwè luse. Wèwè usokoka mpèkaatù webè, kwàkutantakù to.” To.

⁷¹ Ki Yakòbò pàvwàye, nudi bamanyè's, ditùkù dyà pààkacyàbu wàkatwilangana ne Èsawù mwanààbò awu. Kàvwakù dijinga ne dikwàcisha dyà kùdiye díbà adi to. Kàvwà dijinga ne bilwilu byèndè to. Ùvwà mu mudimu wà diibaka dyà byoshelu. Kàcìvwà kàbìdì ne bwòwà bwà Esawù to.

⁷² Misambu 16.8, Davidì mmwambè ne: “Ndi mutèèke Mukalenge kumpàlà kwànyì.” Aci's ki cintu cìmpè cyà dyenza. Misambu 16.8: “Ndi mutèèke Mukalenge kumpàlà kwànyì.” Mùshindù awu, kàvwakù mufwànyine kupeta cibwejàkàji pa bwalu abu to. Ùvwà muswè kwikala mumanyè Bwikadi Bwèndè, nànkù Davidì wàkamba ne: “Ntu misangu yònsò ànu mutèèke Mukalenge kumpàlà kwànyì. Mpindyewu mèmè, Davidì, ndi mutèèke Mukalenge kumpàlà kwànyì, bwà kwikala misangu yònsò ànu mumanyè—mumanyè Bwikadi bwà Nzambi.” Aci kî ncifwànyinèkù kwikala dileesòna dìmpè bwètù bònsò dilòòlò edi anyi? Kwikala batèèke Mukalenge kumpàlà kwètù bwà twikalè bamanyè Bwikadi Bwèndè. Mutèèkè Yèyè kumpàla. Bwà cinyi? Mutèèkè Yèyè kumpàla, kumpàla kwèbè. Bwà cinyi? Díbà adi kwàkwenza mpèkaatù to paùdì ujingulula ne udi díbà dyònsò ànu mu Bwikadi bwà Nzambi. Paùdì ujingulula ne Nzambi ùdi mwaba apu, udi utàbaleela byùdì wamba.

⁷³ Muntu, pàdiye wèla meeji ne Nzambi mmuyè, neàakulé bwakùlàvì, neàalakanè bakàji, neènzè...neìbè, neìbilè, neàshimè. Neènzè nì cintu kanà cyònsò pàdiye wèla meeji ne Nzambi kèna ùmumòna to. Kàdi mubwejè mu Bwikadi bwà Nzambi, neàcilekèlè mpindyewu mene. Nwamònu anyi? Kàdi Davidì wàkamba ne: “Ntu misangu yònsò ànu mutèèke Mukalenge kumpàlà kwànyì.” Aci's ki cintu cìmpè. Kabyèna bikèmesha to pààkambà Nzambi ne yèyè ùvwà muntu wa pa mwoyi Wèndè Sungasunga. Muntu neènzè byònsò pàdiye

wèla meeji ne Nzambi kèna pabwîpi apu to. Kàdi pàdiye ùjingulula ne Nzambi ùdi pabwîpi apu, nukààdikù kacya bamòne ngènzàmpèkààtù anyi? Muntu wa difwàna dyà Nzambi àdidingè àseemenè mwab'awu, yèyè's neàlekelè kwakula bwakùlavi, bwà yèyèku ne kaneemu kèètù aka. Nwamònu anyi? Kààkwenzakù minèkù yà bundù yìwàye mufwànyine kwikala mwenzè ayi to. Nwamònu anyi? Nwamònu's, yèyè neàlekelè abi, bwalu mmumanyè ne ùdi mu Bwikadi bwà Nzambi, bwalu Nzambi mmusòmbèle mu ntentà wa cisàmbà Cyèndè. Nwamònu anyi?

⁷⁴ Paanyimà pàà Davìdi mumanè kwenza cyôci eci, wàkamba ne: “Mwoyi wànyì newùcyonkomokè.” Mvw'a kujingakù bwà nwaçibala, Misambu 16. “Mwoyi wànyì newùcyonkomokè, ne mubidi wànyì newìkishè mu ditèkemena.” Bwà cinyi? Mwoyi wànyì newùcyonkomokè bwalu ndi ne Nzambi kumpàlà kwànyì dîbà dyònsò. “Ne mubidi wànyì newìkishè mu ditèkemena; mèmè mufwè, nèmbiishiibwè ku lufù. Bwalu Yèyè kàakwanyishakù to bwà Wa Cijila Wèndè àmonè dibola, anyi Kààkulekelakù musùukà Wèndè mu ifernò to.” Nwamònu anyi? Mpààkatèèkà Davìdi Nzambi kumpàlà kwèndè, ne mwikàle mumanyè ne dîbà dyònsò ùvwa mu Bwikadi bwà Nzambi apu. “Anji kèbaayi dyàmbedi Bukalenge bwà Nzambi.”

⁷⁵ Teèlejààyaaku mpindyewu, nwènu èkèleeziyà, ndi munùrangè. Nènku ndi muswè nùntèèlèjè mpindyewu. Ànu mùvwà Mwanèètù McCullough ne ciibidilu cyà kwamba ne: “Nyewù ngamba cintu.” Ikàlà misangu yònsò ànu mutèèke Mukalenge kumpàlà kwèbè, ne kwènjikù cintu nànsha cimwè cyùdì kùyi mufwànyine kwenza mu Bwikadi Bwèndè to, bwalu mMukutàngile. Nwamònu anyi? Mukalenge mmwasè citùùdilu cinyùngùlùkile aba bàdi bàMuciina. Yèyè kèna... Yèyè ùdi ushààla ànu pabwîpi neebè apu. Ne Yèyè mmumanyè byònsò byùdi wenza, ne wèwè udi ne cyà kujingulula cyôci aci. Paùkaadi ubanga kwamba mashimi, kùshimi nànsha, wavùluka ne, Nzambi mmukutèèlèje. Wèwè mubangè kwenza kaadiibila kakesè, kwibidi to, Nzambi ùdi ùkujooja. Wèwè mubangè kutèèla Dîna Dyèndè citèèlâtèèlè, kwènji nànkù to, Nzambi mmukutèèlèje. Wèwè mubangè kunwà mucì wà mfwankà, Yèyè mmukutàngile. Nwamònu anyi? Wèndè... Kale wàwa tuvwa twimba musambu wa ne: “Mu njila mujimà mutàngile ku cisòmbedi cilelèlè cyà musùukà, kùdi dîsù dikujooja; cidya cyònsò cyùdì wela, dîsù dinène edi nditàbàle, kùdi dîsù dikujooja.” Vùlukà, enzà bu Davìdi, tèeka misangu yònsò ànu Mukalenge kumpàlà kwèbè. Dîbà adi mwoyi wèbè newùcyonkomokè ne mubidi wèbè newìkishè mu ditèkemena, bwalu Yèyè ngwàkacilaya. Èyowà's, mukalenge. Yèyè ùvwa mumanyè ne ùvwa mwà kubiika ku lufù bwalu Nzambi ngwàkacilaya. Èyo.

⁷⁶ Patùdì tubwela mu Bwikadi Bwèndè, tudi tushintuluka, katùciyikù mwà kwikala bàà mwomùmwè to. Tàngilàayi

munda mwà bikondo byònsò, byà cipidi cyònsò cyà nsòmbelu, tàngilàayi bantu. Tàngilàayi Abraham. Wèwè udi wamba ne: “Èè, nsòmbelu mushintùlùke ùdi ànu bwà bambi.” Kaa, to. Nsòmbelu mushintùlùke mbwà bantu bònsò. Nwamònu anyi?

⁷⁷ Mpindyewu, Abraham ùvwa cidimè, kàdi pààkuumvwaye Dìyi dyà Nzambi dyakula nendè, ne kumònayè cikèènà-kumòna aci, wàkalwa muntu mushintùlùke kubangila ànu pa dībà adi. Wàkatàpuluka ne bàà mu cifuku cyèndè, ne beena dyèndè bònsò, ne wàkenda bu mwena lwendu ne mwenyi, mu buloba bwenyi, matùkù èndè ónsò a mwoyi, musòmbèle mu ntentà, bwalu yèyè wàkajikula bitòoke tòò ne ùvwa wènda ùkebangana ne cimenga cívwa Muciìbaki ne Mucyènji mwikàle Nzambi. Ùvwa mumanyè ne kùvwa Nzambi, ne kùvwa cimenga mwaba kampànda cívwa Muciìbaki ne Mucyenji mwikàle Nzambi. Ki cidì Ebèlù 11 ùtwàmbila ne, ùvwa wènda ùkebangana ne cimenga cívwa Muciìbaki ne Mucyènji mwikàle Nzambi. Ùvwa muntu mushintùlùke, pèndè's ùvwa ànu cidimè wetù wa pàtupù ewu. Kadi wàkamòna cikèènà-kumòna ne wàkabwela mu Bwikadi bwà Nzambi, ne wàkalwa muntu mushintùlùke kubangila ànu piinè apu.

⁷⁸ Mòsà, ùvwa mulami wa mikòòkò, kàdi wàkalwa muntu mushintùlùke pàakabwelàye mu Bwikadi bwà Nzambi. Ùvwa muntu mutulùmùke, ùvwa wènda ùnyeema Pàlò, ne cilwilu cijimà cyènda cilumbatangana nendè. Kàdi ne dikombo mu cyanza, wàkaalukila e kukwàtayè ditùngà dijimà. Nwamònu anyi? Bwà cinyi? Wàkabwela mu Bwikadi bwà Nzambi. Wàkalwa muntu mushintùlùke, mulami wa mikòòkò.

⁷⁹ Peetèlù, mulòbi, kàyi mumanyè cintu nànsha cìmwè cyà bulòbi...anyi kàyi kàyi mumanyè cintu nànsha cìmwè pa bìdi bitàngilà Nzambi to, cintu cìmwèpelè cívwaye pàmwàpa mumanyè cívwa ànu mmwà kukwàta mishipa. Kàdi pàakabwelàye mu Bwikadi bwà Nzambi, ne kumòna Mufùki munène Uvwa mwà kufùka mishipa awu, pàakamwambilàYe bwà kwela makòndò bwà dikòkà dyà mishipa. Kakùvwa mishipa nànsha mikesè muntwamu to, yèyè wàkakòka ànu makòndò èndè cyanààna. Kàdi yèyè kwamba ne: “Ku Dìyi Dyèbè, Mukalenge. Ndi ngiitabuujà ne Wèwè udi Mwàna wa Nzambi, ne Wèwè mupwekèshe. . .mémè mupwekèshe bukòndò, Wèwè ngwàngambìdi bwà kubùpwekèsha; ku Dìyi Dyèbè, bwalu Wèwè ne Dìyi Dyèbè nudi cintu cìmwè, ndi mpwekèsha bukòndò.” Kàdi pàakabangàye kubùkòka anyi, wàkamba ne: “Seemènà kule, Mukalenge, mémè ndi muntu mubiìpe.” Nwamònu's, mulòbi, paanyimà pàa Peetèlò mumanè kutwilangana ne Kilistò yèyè kàcívwa kàbìdi wa mwomùmwè to. Yèyè, paanyimà, ùkaavwa ne lulamatu lwàbúngi kùdi Nzambi, mu mùshindù wa ne wàkapèshìibwa nsapì yà Bukalenge. Èyowà's, mukalenge.

⁸⁰ Pòlò, Mùfaalèsà mudìtu wa mènà, mulongè tùlaasà ne mulongèsha mu ntèndeleeleu yònsò wa...uvwakù pa buloba

mu ditùkù adi awu, umwe wa ku bamanyi bàà mabàla bàà batàmbe kutùmbuka bàvwà bamanyike mu ditùnga. Kàdi dîngà ditùkù pàakafikàye kumpàlà kwà Dikunji dyà Kapyà adi, Nzambì uvwayè mukèngèshèkèngèshe awu, mu dipanga. Yèyè ùvwa Mùfaalèsà, kàvwa wítabuujà ne Nzambì uvwa Muntu to. Ùvwa mumanyè ne Nzambì ùvwa Dikunji dyà Kapyà, Dyòdi ndyàkalombolà cisàmbà Cyèndè mu dipàtuka dyà mu Èjiipitù, nDivwà naabò mu lwendu lwònsò alu. Kàdi pàakamònyè Dikunji dyà Kapyà edi, wàkapòna kutwà mpàla panshi. Ki kuumvwayè Dìyì dyàmba ne: “Shawùlà, udi uNkèngesha bwà cinyi?”

Yèyè ne: “Wèwè udi Nganyì, Mukalenge?”

Yèyè ne: “Ndi Yesù.”

⁸¹ Yèyè ùvwa muntu, mwinè wàkamba ne: “Nwàkabàtìijibwa bìshi?” awu. Ùkaavwa mu Bwikadi bwà Nzambì. Ùvwa muntu mushintùlùke kubangila ànu apu, ùkaavwa mu Bwikadi bwà Nzambì. Bùtu bùshintulula muntu’s.

⁸² Charles G. Finney, mwakwidyànganyi, mwakwidyànganyi munène wa mu Philadelphie, kàdi pàakabwelaye mu Bwikadi bwà Nzambì yèyè’s wàkalekelela dilonga dyèndè dyà mikenji adi panshi ne kushàala muyiishi mutàmbe kwikala wa bukòlè uvwa ditùnga edi kadìyikù dyanjì kupeta to.

[Katùpà kàà mukàbà wà mèyi munda mutupù—Muf.] . . . ùvwa muyiishi, bwalu dîngà ditùkù wàkabwela mu Bwikadi bwà Nzambì. Kwelayè meeji, musangu kampànda ne, ùvwa mwà kulonga mudimu wà bwambi. S’nudi bamanyè mukàndà wèndè awu. Mèmè ndi ne mukàndà wèndè wà bwalu-bulonda bwà nsòmbelu wèndè. Kupàtukayè bwà kuya kasambila. Ùvwa wèla meeji ne ùvwa muyiishi. Ùvwa ne dijinga kampànda, dyà ne ùvwa muswè kuyiisha, ne kwangatayè ndambù wa mayiisha àvwàye mufwànyìne kuteeta bwà kuyiisha. Kupàtukayè ditùkù kampànda, mu birò byèndè amu, bwà kuya kasambila, kuyayè mu diitu. Kutwàye binù paanyimà pàà mucì wà kale wùvwàbo buupùle, kùvwàye ùya mu mapingaja ònsò. Mutèndeledi wa dikèma, kàdi kàvwa mwitabùùje Cyòci aci to.

Kùvwa bakàji bàbìdì mu èkèleeziyà amu, bàvwà ànu bàmba ne: “Mukalenge Finney, tudi tusambila bwà ùpetè Nyumà Mwîmpè.”

Yèyè ne: “Mèmè’s ndi ne Nyumà Mwîmpè.” Yèyè ne: “S’ndi muyiishi.”

⁸³ Bòbò ne: “Mukalenge Finney, wèwè udi muntu munène, ne udi ne dishikuluja dyà Dìyì, kàdi bìdì bikukèngela Nyumà Mwîmpè. Twètù tudi tukusambidila.” Bakàji bakesè bàà kalolo.

⁸⁴ Ki kutùngunukayè, ànu nàнку ànu nàнку. Nènku ditùkù dyònsò divwàye ùpàtuka ùya paanyima pàà birò byèndè abi, mfumwèndè wa mudimu ne bantu bònsò bàà mùvwàye ùkwacila

mudimu abu, yêyè ùvwa ùpàtuka mu bìrò byèndè ùya kuntwaku bwà kusambila. Ki dīngà ditùkù yêyè kuntwaku munkaci mwà kusambila kàdi kuumvwayè cisuku cinyunga. Kwelayè meeji ne mfùmwendè wa mudimu awu nguvwa ulwa, wènda ùmukèba. Kukàtamukayè ne lukàsà lwònsò. Ùvwa munkaci mwà kwamba ne: “Mukalenge Nzambì, ndi muKwitàbùùje.” Kàdi cisuku pààkanyungàci, kwenzayè ne: “Uhm! Uhm! Uhm!” kajuuka kuulu kwamba, kukènzakana, bwà kumòna ne cìvwa cinyungishe cisuku aci ncinyi. Nènku dībà adi ki dyàkabwelàye mu Bwikadi bwà Nzambì. Kujingululayè ne cisuku aci cìvwa cinyungè mu kiipàcìlà kampànda. Kushààlayè mwimàne mwab’awu, binsònji bìmupwekela pa matàma. Kwambayè ne: “Pàmwàpa bakàji bàba mbabingè. Ndi ngumvwa bundù bwà muntu ùmmòna ngaakula ne Nzambì wanyì, kàdi pàànyì’s ndi mufwànyine kwela meeji ne bìvwa lumù bwà muntu ùmmòna nyiikila ne mfùmwanýi wa mudimu. Mùshindù mwinè wùdi Mukalenge wanyì mutàmbe mfùmwanýi wa mudimu ku bunène’s!” Kwambayè ne: “Mukalenge, mfwilèku luse ùnguujè ne Nyumà Mwímpè,” ki kubangayè kutuuta mikòbolo ne kwela mbilà. Ùvwa mu Bwikadi bwà Nzambì. Kwasayè lubilu lukolè mutàngile mu cimenga ku bìrò byèndè. Wàkaditwa mu kwela kwà mbilà mikolè mu mùshindù wà ne wàkaya paanyimà pàa ciibi, kwambayè ne: “Mukalenge, nènKufwishè bundù. Nsokòkèku paanyimà apa too ne pàngààjikijà dipaluka edi.” Bwà cinyi? Ùvwa mubwelè mu Bwikadi bwà Nzambì. Ùvwa muntu mushintùlùke. Mayiisha àvwàye ne ciibidilu cyà kuyiisha awu, wàkayiisha ànu mayiisha àmweàmwe awu kàdi misùùkà kulwayi ku cyoshelu. Nwamònu’s, ùvwa mu Bwikadi bwà Nzambì.

⁸⁵ Moody, mulongolodi mukesè wa bisàbaatà wa kale, kàyikù nànsha mumanyè ABC bìmpè to. Ncyà bushùwà. Wèndè mwakulu wùvwa mukwàte ne byà luse. Muntu kampanda wàkangambila dīngà ditùkù ne: “Wèbè mwakulu mmukwàte ne byà luse byenzè ne bibi’s, Mukalenge Moody.”

Yêyè ne: “Kadi’s nyewù mpeta naawù misùùkà.” Pa nànku . . .

⁸⁶ Dīngà ditùkù bibèjibeji, mufùndi kuyayè bwà kafùnda cibèjibeji. Kuyayè kuntwaku bwà kumòna mùvwà muntu ewu mufwànyine kukwàta misùmbà yà bantu mu ngiikàdìlù kanà yònsò, muntu mukesè, wa mutù dibàla, ne bikwàbò byònsò, ne mwikàle ne myedi milembèlèle too ne kwìnshì, mwenzè kafù-dibùngù, ne ùvwa muntu wa mmwènèkelu wa wènza ne bwòwà pa kumutàngila. Pa nànku cibèjibeji eci cyàkamwamba mambàvi, cyàmba ne: “Nànsha twamba mwinè ncyèna mmònakù cìdì muntu mufwànyine kumòna mu Dwight Moody to.” Yêyè ne: “Mmubì wa nkòtòòtò, dīyì dyèndè ndyà kaamwènzà, ùdi ne myedi mipwekè too ne mu cìfùka, ùdi ne mutù dibàla ànu bu diwòji.” Ki yêyè ne: “Nànsha twamba

mwinè mmunyi mùdiku muntu mufwànyine kuya kamòna cintu kampànda mu Moody?”

⁸⁷ Ki kwenzekabi ne mulongolodi wa ndongamu wa Moody kucimònayè, kwambayè ne: “Tàngilà, Mukalenge Moody, ndi muswè nkubadilè eci nùku.” Moody kàvwa mumanyè mwà kudibadilaci to. Ki kwambayè ne: “Nènkubadilè mèyi a mufùndi.” Ki kucifùndayè.

⁸⁸ Moody kusàkayè ànu makaaya cyanààna, kwambayè ne: “Ncyà bushùwà ne kî mmémè to, bàdi bàlwa bwà kumòna Kilstò.” Ki cyònsò cìvwàku’s. Bwà cinyi? Ûvwa mu Bwikadi bwà Nzambi. Muumùke ku dilongolola dyà bidyacilu byà bisàbaatà, byà bantu kuvwàlabò; ùkaavwa ùvwàdika bantu Èvànjeeliyò wa didilongolola. Bwà cinyi? Ûvwa mu Bwikadi bwà Nzambi. Cyà bushùwà’s.

⁸⁹ Mukàji mutekète musangu kampànda wàkalwa mu Bwikadi bwà Nzambi, mupiile ne mwèndè mwònsò. Mu katanci kakesè pàakajingululàye ne ùvwa mu Bwikadi bwà Nzambi, mpèkaatù ne mpèkaatù yònsò wàkafwidiibwa luse ne yèyè wàkalwa mukezùke ne mutòoke bu cilòngò cyà mbata. Kaa, ekèlekèle! Búngi bwinè bwà bakwàbò bantu bàndi mufwànyine kutèèla’s, kàdi dìbà kî ndifwànyine kukùmbana to.

⁹⁰ Kàdi ndi muswè kwakulakù ndambù bwànyì mèmè mwinè. Ncinyi cìvwàku cìfwànyine kwikala cishààdile kuntàmba mèmè? Kùmvwà mèmè mpenyi? Mupàtùkile mu fàmiyè wa baakanwàyi, mupàtùkile mu fàmiyè wa bashebeyanganyi, mupàtùkile mu fàmiyè wa basùmbishi bàà mu musokoko bàà maalà a kapyà. Ne nwènù’s nudi bamanyè aci, yònsò wa kunùdi mmucimanyè, mumanyè ne nduumù kaayi lutùvwà twètù aba naalù muneemu emu. Bantu kabàvwakù bàtwàkwisha mu njila to. Mvwa nya mu ville, mbanga kwakulakù ne muntu, muntu nànsha umwe kàvwa ùngaakwishakù to ambà ànu muntu kàyi mwaba awu. Pàvwabo bàngaakwisha, muntu mukwàbò yèyè ànu mulwè mwab’awu, awu ùmba ùnshiya. Nènkù mvwà nshààla mwab’awu ndila mwadi ne: “To, kî mmwòmò to, kabìtu nànkù to. Ebi’s mbibì.”

⁹¹ Kàdi dīngà ditùkù mèmè kubwela mu Bwikadi bwà Nzambi. Yèyè kunshintulula ne kumvwija mwànà wa balùme wa mshindù mukwàbò. Ngàsà Wendè ngwàkambweja mu Bwikadi Bwèndè. Kacya ncitukù muswè kuMùshiya nànsha. Ndi kaaba aka mpindyewu kùkaadi bidimu makùmi àsàtù ne byà mu njila. Ncyèna muswè kuBùshiya to. Ndi ne ditwishiiibwa dyà ne nēngiikalè ànuMù misangu yònsò. Nànsha lufù lwòlò lwinè kalwàdyàkuntàpululakù ne Bwikadi Bwèndè to. To. Nēngiikalè Nendè kashidi. Pāmmwènè Bwikadi Bwendè bwà musangu wà kumpàla, ngàkeela lubilà bu Yeshàayi ne: “Dyàkabi dyànyì.” Dìbà adi kì kundengaYè ne ngàsà Wendè. Ngàkalwa muntu mushintùlùke. Kaamuntu kapidyè diitabuuja kàvwà ne ciibidilu cyà kupàtuka mwab’ewu ne kwenza maalù a lukutukutu ne

bikwàbò byònsò abi aku, kushintulukakù, ne kubangila ànu piinè apu ki mèmè kulwa mwan'Èndè. Kubangila ànu apu, ntu mujingè kufila nsòmbelu wanyì mujimà ku mudimu Wèndè, njinga ànu bwà ngikalakù ne mikwàbò nsòmbelu binunu dikùmi yà kufila Bwèndè Yèyè. Ewu nùnkù ùkaadi wènda ùsùnsuka bikolè mpindyewu, bidimu makùmi àtaanu ne bisàtù byàpici. Pabwìpi ne makumi àsàtù ne bisàtù byà ku byòbì abi, anyì makumi àsàtù ne bìbìdì byà ku byòbì bìdì mu Èvànjeeliyò. Ndi njinga bwà ngikalakù ne bikwàbò cinunu byà mèmè mufwànyine kupicishilakù. Bwà cinyi? Pàngààkenzà ànu ne ngààbwedì mu Bwikadi Bwèndè ne kumanya ne kùvwakù Kampànda Uvwa munangè ewu uvwabò kabàyi mwà kunanga awu, ne kùvwa Kampànda Uvwa munnangèku pàvwà muntu mukwàbò nànsha umwe kàyi munnangè, kùvwakù Kampànda Uvwa uncyùka pàvwà muntu mukwàbò nànsha umwe kàyi uncyùka. Mèmè kwela mabòkò àànyì manyùngùlùkile nkùrusè Wèndè, mèmè kumuupukila mu cyàdì cyànyì, ki mèmè ne Yèyè twètù kulwa umwe díbà adi. Ki kubangila ànu piinè apu mèmè kuMunanga. Yèyè kushìya matobà à Mashi Èndè mu cyàdì cyànyì ne ku mwoyi wànyì, pa kundenga ne kumfwila luse ku mpèkaatù yànyì, nènku ndi ne disànka dilòòlò edi dyà kwikalakù umwe wa ku Bèndè. Ncìtukù njinga kuumuka mu mwaba wà mu Dyulu ewu to, nànsha mùkaadi muteecyanganyi muteetètètèe misangu yàbùngì bwà kunswishisha; kàdì ndi mu dikùbìbwa mu kazùbù kàà ciikishilu kàà Nzambì, ne disànka mu dinanga ne ngàsà Wèndè, ne ndi musòmbèlè luseke lwà ma-àlèluuyàh. Ekèlekèlè! Cidi cicyònkomoja mwoyi wànyì.

⁹² Ndi mMufùndila muntu yònsò udi muzengèlè. Nyewù nkufùndilaYè kùdì wèwè udi kùyi ne ditèkemena awu. Wèwè utu kacya kùyikù mwanji kwikala mu Bwikadi Bwèndè awu, cintu cimwèpelè cìdì cikèngela bwà wèwè kwenza nkutonda mpèkaatù yèbè ne kujingulula ne udi mupiiile, ne Nzambì mmutùmìne Mwanjèlo awu díyì dilòòlò edi, udi ubiikidiibwa ne n'Nyumà Mwìmpè awu, wìkala mwà kuumusha mpèkaatù yèbè yònsò. Díbà adi newèlè lubilà ne: “Mukalenge, mmèmè ewu, ntùmaaku.” Díbà adi newèlè byanza muulu ne newimbè ne: “NèmMutùmbishè! NèmMutùmbishè! Tùmbishàayi Mwànà wa mùkòòkò mushipa bwà bangènzàmpèkaatù. Mupàayi butùmbi, nwènù bantu bònsò, bwalu Mashi Èndè mmasukùlè dikeji dyònsò.” Mèmè ndi muMunangè. Kàdì wèwè? Mwikàlè ne mwoyi mu Bwikadi Bwèndè!

⁹³ Ndi mulwè ku cyambilu eku mu dindà emu, mudyùmwè bibì byà kacya ne nsaama bikolè. . . Mvwa—mvwa mu Kentucky mwàmwa lumingu lushààle elu ne bàmwè balundà bàànyì bàà pa mwoyi bàdì basòmbè apa aba. Bu mèmè mushààlemù ntàntà mule, nùnkù mbanshebèye, nùnkù mbanshebèye cyà bushùwà, ne musàngèelu awu, bàmwè bàà ku benji bàà cikukù bàà batàmbe bwìmpè bànkadiku mumanyè kacya bàndèla. Nènku

pàndì nguukuta bu lunyiù, ngamba kutaayika apu ki ne: “Mwanèètù Branham, kwènàku muswè kudyà cikampànda eci anyì?” Ne ciinè aci ànu cîmpè cyà dikèma mu mùshindù wà ne, mvwa nteeta ànu kucipwekesha munda ku bukolè. Mvwa nshààla ànu muukùte mu mùshindù wà ncìciyi nànsha mwà kunyungakù to. Ncì—ncìcìvwakù mwà kulààla to, nènku mvwa njuuka nyùngulukakù katanci. Nènku ncìvwa mudyùmvwè bîmpè menemene to pângààbwedì mwab’ewu mu dindà emu apu. Kàdi ndi mwenzè ànu mbwela mu Bwikadi Bwèndè anyì, cyùmba cikòsa bwalu’s. Ncyumbè cikòse bwalu, byònsò byùmba bìjìmina díbà adi. Ncyà bushùwà. Kaa, kwikala ne mwoyi mu Bwikadi Bwèndè’s wè!

NémMutùmbishè, némMutùmbishè,
Tùmbishàayi Mwànà wa mùkòòkò mushipa
bwà bangènzàmpèkààtù;
Mupàayi butùmbi nwènù bantu bònsò,
Bwalu Mashi Èndè mmasukùle dikeji dyònsò.

Twìnyikààyaaku mitù yètù mpindyewu.

[Mwanèètù Branham ùdi wimbila *NémMutùmbishè* mu matàma—Muf.]

Bwalu Yèyè mmungenzèle byàbùngì be;
Mmumfwile luse ku dishipa dyànyì dyà
mikenji;
Ne Mashi Èndè mmasukùle mpèkaatù wànyì.
NémMutùmbishè, némMutùmbishè,
Tùmbishàayi Mwànà wa mùkòòkò mushipa
bwà bangènzàmpèkààtù;
Mupàayi butùmbi nwènù bantu bònsò,
Bwalu Mashi Èndè mmasukùle dikeji dyònsò.

[Mwanèètù Branham ùdi wimbila *NémMutùmbishè* mu matàma—Muf.]

⁹⁴ Mpindyewu pawikalà mwab’ewu dilòlò edi...Ne ndi mumanyè ne Bwikadi Bwèndè bùdi kaaba aka. Pâmvwà mwimanè muntu mwàmwa kwènji katanci, ne mwànà mukèsè wa bakàji wa mu Église de Dieu, Nyumà Mwimpè kubwela e kulwa pambidi pàànyì pâmvwà munkaci mwà kusambidila mwànà mukèsè awu apu. Baledi bèndè bàvwa balwè bàfùmina ku citùùdilu cyà Église de Dieu wa ku Anderson. Kì mutàngidi wa kuntwaku, bu mùvwàye mumanyè mwànà awu, bangàngàbukà bambè ne “kì nkufwànyine...ùdi ne cyà kufwà katanci aka, bwà kànsèrè kàà mu mashi.” Mwànà mukèsè wa bakàji, wa kalolo awu, mu bikondo byèndè byà ndekeelu díbà adi. Kulwayè paanyimà apu e kunkwàtayè mu cyanza ne kèndè kaacyanza kakesè aku, kùlàkàne kwònsò, ne nshìngì ne bikwàbò bìvwàbo bamutwèmu abi, kashààle bleu. Mèmè kumutàngila, kumòna cikèèna-kumòna. Baledi bèndè bàvwa ànu bàbala mukàndà mwab’awu. Kabàvwa ne civwàbo

bamanyè pa bwalu abu to. Mutàngidi wa bônso wa mu citùùdilu amu kubâmbilayè, kwambayè bwà kulwabò ne mwânà awu mwab'ewu. Bàvwa baswè kwalukila patùvwà ne mudimu wà dyondopa apu. Ki mèmè ne: “Lwâyi ne mwânà awu mpindyewu,” mvwa mudyûmvwè mulombòdìibwe.

⁹⁵ Pâmvwà mwimàne mwômò amu mene apu, Nyumà Mwîmpè kwalukila buludì e kupâtula bwalu-bulonda bwà mwânà awu. Yèyè kwamba byônso mwâkenzekàbi, cìvwàbo benzè. Kwamba kalumbilà kàà mwânà mukesè wa bakàji awu, kàvwa kàà kwikala mwimbi wa pyànò. Ki maamù awu kwambayè ànu kwela lubilà lukolè. Ki taatù awu kwambayè ne: “Aci mbulelèlà bwà Nzambi.” Mmusòmbe mwab'awu mene mu kâshinyi mpindyewu munkaci mwà kucitèèleja, kâyi mupetè mwà kubwela to, mmusòmbèle pambèlù pàapa ùcitèèleja mpindyewu.

⁹⁶ Kulwakù cibwikilu cinènè cyà mundìdimbì mulembèlèle kumutù kwà mwânà awu. Ki mèmè kwamba ne: “Sàtaanà, udi mucimùnyìibwe.” “Kùtu ne kânsungânsungà kùdi bantu to, Nzambi. Nènku ku bukolè bwà dibìkà Dyèbè dyà ku lufù, ne mèmè bu musadidi Webè, ndi ngiipata démon ewu pa mwânà ewu.” Bukênkè bukolè bunènè kupenyabù kumutù kwèndè, kumba kùjika. Amen. Huh? Bushùwà's, Yèyè mmukùmbànyine butùmbi bwònsò!

⁹⁷ Yèyè mmumanyè maalu ônsò. Yèyè mmumanyè mwoyi wèbè. Ne wèwè udi mumanyè cyùdi wela meeji aci; mmucimanyè, Yèyè pèndè. Kwòkò kampèkaatù kakesè kakulamàte dilòòlò edi, ne kùyi muswè kuya naakù mu Bwikadi bwà Nzambi, swàku bwà musangu ewu kàbidi wèlè cyanza muulu wamba ne: “Mwanèètù Branham, nsambidilèku, ndi muswè kwikala mu Bwikadi Bwèndè, mu Ditùkù adi, nciyi ne dipiila to.” Nzambi ànùbènèshè. Byanza byàbùngi, Nzambi ngudi ucimòna. Mu Bwikadi Bwèndè. Mpindyewu nènkwambilè cyà wèwè kwenza. Mpindyewu tèèlejà ànu ne ntèmà yònsò. Enzà mwàkenzà Davidi amu, tèeka Mukalenge kumpàlà kwèbè mpindyewu mene. Tèeka Mukalenge pankaci pèèbè wèwè ne mpèkaatù awu, cyònsò cidi kampèkaatù kiinè kakesè kàdi kàkutuucishà musòdi aku. Ncifwànyine kwikala mashimi, ncfiwànyine kwikala bwìvi, ncfiwànyine kwikala dyela dyà meeji mabì, ncfiwànyine kwikala cijji, ncfiwànyine kwikala dinwà dyà maalà, ncfiwànyine kwikala dinwà dyà mfwankà, ncfiwànyine kwikala ditwà dyà twalàtà twà mfrangà. Mèmè ncyèna mumanyè ne ncinyi to. Ncfiwànyine kwikala dyalakana. Ncfiwànyine kwikala cintu kanà cyònsò. Mèmè ncyèna mumanyè ne ncinyi to. Cyònsò cidìci aci, tèeka Mukalenge kumpàlà kwèbè. Nènku dîbà adi mwoyi wèbè newùcyonkomokè, ne mubidi wèbè newikishè mu ditèkemena, bwalu udi mumanyè ne Kilstò ngwàkalaya ne Yèyè neàjuulè cyàkàbidi ku matukù a ndekeelu. PààmwènekàYe,

netwikalè bafwànàngàne Nendè. Kwènàku muswè kwenza nàнку mpindyewu, patùdi tusambila apa anyi?

⁹⁸ Taatù wetù wa mu Dyulu, nkaaDiyiisha kakesè kakòsolola tutùpà tutùpà kùdi musadidi Webè muzengèle. Kàdi mvwa mwelè ànu meeji ku cyena-bwalu cya “kwikala musòmbèle mu Bwikadi bwà Nzambi” aci. Nènku nyewù tumòna dilòlòlò edi cikùmà cikaadici cyenzè pa bantu bàà cijila pa kubwela mu Bwikadi Bwèbè, cikùmà civwàci cyenzè pa bòbò abu. Beena meeji, bapròfetà banènè bàà bukolè balongolola kùdi Nzambi, ne batùma bwà kuyiisha Dìyi, kàdi bàtwilangana Nendè mpàla ne mpàla ne bàdishinda panshi bu muntu mufwè. Citwènzà ncinyi mu ditùkù adi, Mukalenge? Nyewù twedyàngànyiku meeji. Tudi beelàngànepù meeji. Byanza bitwè ku makùmi ànaayi anyi makùmi àtaanu byedyàngànyipu meeji, Mukalenge, bwalu mbafùme ku dyela byanza abi muulu, anyi mwoyi mwinshì mwa cyanza aci, beelàngàne meeji pa ditwilangana Nendè kacya twàbanga kwakula. Ncinyi civwàbo bafwànyine kwenza bu ne bivwa bikèngela kutwilanganabò Nendè?

⁹⁹ Byànyì byanza, Mukalenge, mbyela muulu. Cingènzà ncinyi? Mpindyewu, Taatù, ndi ne bintu byàbùngì bintù ngenza bibi. Ndi mfùma ku ditonda mpèkaatù wanyì mu dindà emu kumpàlà kwà èkèleeziyà, mùmvwà muKutondéleyè ku lusongo lwà mukùnà kwàka mu dindà adi pàvwà cipeepèlè cituuta ne nèjè ulòka apu, ne kwìnè ku lusongo lwà mukùnà aku, mùmvwà mudilè mwadi ne muKulòmbe bwà kumfwilakù luse bwà dikùtakana dyànyì. Ne mùshindù mwinè wùmvwà nciina bikolè bwà kulwa kumpàlà kwà bàna bèètù, bàdi bàmwè bàà kùdibo bàngangata bu musadidi Webè mupròfetà. Nènku, Mukalenge, mùshindù mwinè wùmvwà ngumvwa bìngenza bibi bwà kulwa kumpàlà kwàbò bwà kubàmbila cyenziadi cikùtàkàne mùndi mufwànyine kwenza cintu cyà mùshindù awu, kàdi, Nzambi, mbìmpè bwà musùukà wànyì bwà mèmè kutonda mpèkaatù yànyì nciyi nyisokoka to. Pa nàнку bwà kwikala ne meeji matòòke kumpàlà Kwèbè, ne kumpàlà kwà bantu mene, ngàmutondù, Mukalenge. Ndi mupìile, ndi mupìile ànu menemene. Ndi ndòmba difwidiibwa dyà luse.

¹⁰⁰ Ne pashìishe, Taatù, ndi ne maalu fwèfwèfwè pa bìdi bìKutàngila, mu diKukwàcila dyà mudimu, misangu yàbùngì mvwàkù pàmwàpa mwà kwikala mutùngùnùke kàdi nciyi mucyènzè to. Taatù, ndi ntonda mpèkaatù yànyì. Ndi muswè bwà Mwanjèlo wa Nzambi ànkezùlèku ku cyòci aci, ku Mashi a Yesù. Bikwàbò byanza mbyediibwe muulu dilòlòlò edi, bàmwè bàà kùdibo pàmwàpa kabàtukù banjì kulòmbe luse kacya kwònsò eku to; kàdi ndi mutwishiiibwe bwà cintu cimwèpelè eci ne, twètù batondè mpèkaatù yètù, Nzambi neàyikùpùlè, àyèlè mu mbù wa cipwàmwoyi ne kàyikù ùyivùluka kàbìdi—kàbìdi to. Nènku, Taatù, pàndi ntonda yànyì apa, yà diditwàla dìbi kumpàlà kwà bantu abu, ncivwa muditwàle mèmè mwinè bu

musadidi wa Kilistò to. To. Mwya ncìina ne nkwèpì kùvwà muntu awu mufwànyine kumfikila munda ne ngeela meeji ne ncìvwa muswè kumutàpa ku mwoyi, kàdi ncìvwa mwelè meeji ku cìmvwà munkaci mwà diKwenzela Wèwè to, Mukalenge. Nènku mpindyewu nyewù—nyewù ndòmba bwà Ùmfwilèkù luse. Nènku mpindyewu, Taatù, ndi mumanyè ne mèmè mulòmbè luse ndi mpeta luse, ne Wèwè wayèdi mu mbù wa cipwàmwoyi, ne Kwàdyàkuyivùlukakù kàbìdi to. Nzambi, mèmè ndi ne kusàkidila bwà cyòci aci.

¹⁰¹ Nènku ndi ndòmba bwà Wèwè kwenzakù ne muntu yònsò udi kaaba aka, udi ne mpèkaatù, mpèkaatù wa ùmutuucisha musòdi mu bwalu kanà bwònsò kumpalà kwèndè awu, swàku àmuumùshè ne àteekè Mukalenge kumpalà kwèndè mwàkènzà Davìdi amu. Bwalu mpindyewu tudì twela lubilà lukolè ne: “Dyàkabi dyànyì, bwalu ngàmònu Butùmbì bwà Nzambi. Mèmè ndi mulùmè wa mishìkù mibiipe, anyì mukàji ànyì mwànà wa bakàji wa mishìkù mibiipe, mwànà wa balùmè, anyì cintu kampànda.” Cyònsò citùdi bafwànyine kwikala aci, tudì babiipe, ne tudì tulòmba bwà Mashi a Yesù Kilistò, Mulàmbù mukùmbànàngàne awu, wùtùkezùlè ku mpèkaatù yònsò, bwà twamònakù mwà kusòmbela kashidi mu Bwikadi Bwèndè. Enzàku bwà tùmukè kaaba aka dilòlòlò edi ne myoyi yètù yìcyònkòmòka, ne mubidi wètù mwikishe mu ditèkemena, bamanyè ne, pààlwà Yesù, netùbiishiibwè ku lufù pàmwè Nèndè mu difwànangana Nèndè, ne netutwilanganè Nèndè mu mpeepèlè, mu Dyambwibwa, pìikalà ndekeelu wa byònsò dibala dyà kwenda kwalukila cyànyimà adi dijikè. Tudì tumòna ne cikondo cyà mwandamutekètè cyà èkèleeziyà cikaadi cimanè kubadiibwa, ne tukàadi pabwìpì mpindyewu bwà kujjuuka kuya. Tudì tulòmba, Nzambi, bwà Wèwè, kumpalà kwà Wèwè kwinjila ciibi, kwòkò muntu kaaba aka dilòlòlò edi utu kacya kàyikù mwanji kubwela to, swàku bwà àlwijakajè àbwelè ne lùkàsà lwònsò, bwalu tudì tuumvwa ne ciibi cyà luse, pankaci pàà luse ne cilumbulwidi, cìdi munkaci mwà kukàngiibwa. Aba bàdi baswè kwitaba luse nebàbwelè. Aba bàdi kabàyi baswè kubwela abu nebiikalè ne cyà kupicila ku cilumbulwidi. Nzambi ngudi ukànga ciibi. Swàku bwà kakwìkadi dilòlòlò edi ciibi cikàngila yònsò wa ku bangènzàmpèkaatù bàdi bàtondà aba to. Swàku bwa twètù bònsò tùpetè difwidiibwa dyà luse ne luse lwinè. Mu Dinà dyà Yesù Kilistò.

¹⁰² Nènku mpindyewu, Taatù, bwà babèedi ne beena ntàtu, bwà aba bàdi mu lukèngelu, ndi ndòmbakù bwà ngàsà Webè àfilè byònsò bidìbo naabi lukèngelu abi. Swàku bwà bàbwelè mu Kilistò, mu Bwikadi Bwèndè. Tèekakù Kilistò, Kilistò, mulayi awu ne: “Wàkatàpiibwa mpùtà bwà dishipa dyànyì dyà mikenji,’ ki mpèkaatù yànyì nyòyi ayi. ‘Ku mibùndàbùndà Yèndè ndi mwondopiibwe,’ dìbà adi ndi ntèeka Mukalenge kumpalà kwà disaamà dyànyì. ‘Yèyè udi ku dyàbalùmè dyànyì, ne

ncyàkunyungishiibwakù to, 'dìbà adi ndi ntùngunuka ne kwenda ne dikima, njikula ne ndi mwondòpiibwe. 'Ku mibùndàbùndà Yèndè ndi mwondòpiibwe.'" Enzàku nàнку, Mukalenge, bwà yònsò wa kùdìbo. Ne tudi bamanyè ne twètù tutonda ne myoyi yètù, anyi ne mishikù yètù, ne twitabuuja munda mwà myoyi yètù, dìbà adi tudi tupeta dijinga dyètù.

¹⁰³ Wèwè wàkamba ne: "Paùdi wamba cintu kanà cyònsò, itàbùùjà ne cìdi cyènzeka, udi mwà kupeta ciwàmbi aci." Tudi twitabuuja nàнку, Taatù, ne twitabuuja ne Wèwè neùtùkezùlè ku mpèkaatù yètù yònsò, ne newòndopè mabèèdi ètù ónsò, ne neùtùpè ngàsà, Mukalenge, bwà kuKukwàcila mudimu.

¹⁰⁴ Ikàlàku ne bantu aba. Bààbùngi bàà kùdìbo nebènzè ngendu mu njila yà mìdimà dilòòlò edi. Bààbùngi bàà kùdìbo nebènzè ngendu yà ntàntà yà kilòmèètà yàbùngi. Kwitàbikù bwà cintu nànsha cìmwè cìbènzèkèlè to, Mukalenge. Mbakòsòlòlè ditùngà bwà kulwa kusòmba kaaba aka bwà kutèèleja dibala dyà kwenda kwalukila paanyimà, bwà kumòna mutùkaavwà pabwìpì ne cikondo cyà nshìkidilu. Mpindyewu nyewù ngàbàlòmbu bwà kuumuka kuyabò, batèèke Nzambi kumpàlà kwàbò, misangu yònsò ànu kumpàlà kwàbò, kumpàlà kwà cintu cikwàbò kanà cyònsò. Kumpàlà kwà lwendu lwàbò, kumpàlà kwà dyasa dyàbò dyà lwendu, kumpàlà kwà wabò. . . kumpàlà kwà kujuukabò, paanyimà pàà bamanè kuya kalààla, misangu yònsò kumpàlà kwà kulààlabò, mwaba kanà wònsò wùdìbi, bǎnji bàteekè Nzambi dyàmbedi! "Bwalu Yèyè ùdi ku dyàbalùmè dyànyì, ne mèmè ncyàkunyungishiibwa to." Pashiishe swàku bwà myoyi yàbò yìcyonkomokè, pa kumanya ne bàkaadi ne cìdìbo balòmbè aci, bwalu Nzambi ngudi mucilayè, nènku mubidi wàbò newikishè mu ditèkemena. Enzàku nàнку, Mukalenge, bwalu tudi tulòmba nùнку mu Dìnà dyà Yesù Kìlistò. Amen.

NémMutùmbìshè, némMutùmbìshè,
Tùmbìshàayi Mwànà wa mùkòòkò mushìpa
bwà bangènzàmpèkaatù;
Mupàayi butùmbì nwènù bantu bònsò,
Bwalu Mashì Èndè mmasukùle dikeji dyònsò.

¹⁰⁵ Mpindyewu udi witabuuja ne watèèki Mukalenge pankaci pèèbè ne mpèkaatù webè, pankaci pèèbè ne bubèèdi bwèbè, pankaci pèèbè ne cilèmà cyèbè, pankaci pèèbè ne njila yèbè anyi? "Mukalenge ùdi misangu yònsò ànu kumpàlà kwànyì, ne mèmè ndi mu Bwikadi Bwèndè. Musangu wàlondà wùngààbangà kukwàcìsha mucì wà mfwankà, Mukalenge ùdi kumpàlà kwànyì. Musangu wàlondà wùngààbangà kwalakana, Mukalenge ùdi kumpàlà kwànyì. Musangu wàlondà wùngààbangà kwamba nì ncinyì nì ncinyì cyònsò cyà mafi, Mukalenge ùdi kumpàlà kwànyì. Musangu wàlondà wùngààbangà kwamba cintu cyà cibì, Mukalenge ùdi kumpàlà kwànyì. Ne ncyàkunyungishiibwakù to. Amen. Nèngiikalè

musòmbèle mu Bwikadi Bwèndè ditùkù dyònsò, mu byenzedi byanyi, ditùkù dyònsò mu dyakula dyànyi. Nèngiikalè ngenda byenzè bu ne Mukalenge ùdi kumpàlà kwànyi, bwalu dilòòlò edi ngàaMutèèki kumpàlà kwànyi. Ncyàkunyungishiibwakù to.” Nudi baMunangè anyi?

¹⁰⁶ Mpindyewu, tùjuukilaayaaku kuulu mpindyewu. Kaa, ndi ndyùmvwa ànu bimpè be. Ndi ndyùmvwa ànu bu ne ncyèna muswè kwalukila kumbèlu to. Kàdi nudi bamanyè ne tucidi ànu tusunsa tutwè ku makùmi àbìdi ne tùtaanu kumpàlà kwà dîbà citèemà, ne mèmè ndi ne mèbà matwè ku àbìdi kumpàlà kwà dîbà. Ki mbilenga bilayà anyi? Kaa, ekèlekèle! Kàdi mpindyewu patùdi tuumuka apa, tùvulukàayi ne, tudi ne cyà kwangata Dîna dyà Yesù kwenda naadi, bu ngabu ku butèyi bwònsò. Ne pàatùjingà mateeciibwa ku nseke ne ku nseke yònsò... àteeta kutùpangisha bwà kuvùluka aci, nungàna ànu Dîna dyà cijila adi mu disambila.

Angàtà Dîna dyà Yesù wèndè naadi,
Wèwè mwànà wa kanyinganyinga ne dikènga;
Nedikupè disànkà ne busàmbi,
Kaa, ndà naaDi kwònsò kùyaayà.

Dîna dyà mushinga mukolè, (Dîna dyà
mushinga mukolè!) Éyi dyà bupolè be!
Ditèkemena dyà buloba ne disànkà dyà Dyulu;
Dîna dyà mushinga mukolè, (Dîna dyà
mushinga mukolè!) Éyi dyà bupolè be!
Ditèkemena dyà buloba ne disànkà dyà Dyulu.

¹⁰⁷ Mbanganyi bàdi mpaasàtà wetù ùsànkisha, Mwanèètù Neville? [Disangisha didi dyàmba ne: “Amen.”—Muf.] Kanwènaayikù ne kusàkidila kùdi Mukalenge bwà muntu mwimpè, wa meeji matòòke, wa ditùkù dyònsò, udi witabuujà Evànjeeliyò anyi? [“Amen.”] Ne yèyè ùdi wènza mudimu mulenga wà dikèma mu kutùmikila kwà Méyi matumà a Nzambì, ne kuyiisha kwà Dìyi ne kulama kwà cyuyüya cinènè cyà nyumà eci mu èkèleeziyà dîbà dyònsò. Vùlukaayi ne, nkàadi mukatwè ku Côtè Est kwàka, mukòsòlwèle ku Sud, muyè ku Côtè Ouest, ne mupicile mu Canada, kàdi ncitukù mupetè èkèleeziyà udi wa nyumà mùdi èkèleeziyà ewu kaaba aka mene to. Bàkaadi bayè ne kwà nàka, èyowà, ànyi ndikolesha dyà maalù, anyi mbayè bipapù, anyi mbakwàte mashikà byà kabàyi ànu mwà kunyungakù to. Ki cyònsò cidiku.

¹⁰⁸ Mpindyewu, nudi banangàngàne muntu ne mukwèndè anyi? [Disangisha didi dyàmba ne: “Amen.”—Muf.] Kaa, labùlàngànaayi ku cyanza muntu ne mukwèndè, nwamba ne: “Mukalenge àtumbè.”

¹⁰⁹ [Mwanèètù Branham udi ùlabula bantu ku cyanza—Muf.] Mukalenge àtumbè. Mukalenge àtumbè. Mukalenge àtumbè. Mukalenge àtumbè, mwanèètù wa bakàji. Mukalenge àtumbè.

Ndi ne disànkà bwà mùdì kaaba aka, mwanèètù wa balùmè. Mukalenge àtumbè, mwanèètù wa bakàjì. Nzambi àkubènèshè. Éyo. Nzambi àkubènèshè. Netwènzè nànkù. Nzambi àkubènèshè. Ndi mumanyè cìdì cikukèngela. Nzambi àkubènèshè. Nzambi àkubènèshè.

Angàtà Dìna dya Yesù wèndè naadi,
 Bu Ngabu ku butèyi bwònsò;
 Pààkujìngà mateeciibwa ku nseke ne ku nseke
 yònsò, (Udi wenza cinyi?)
 Nungànà Dìna dya Cijila adi mu disambila.
 Dìna dya mushinga mukolè, (Dìna dya
 mushinga mukolè!) Éyi dya bupòle be! (Éyi
 dya bupòle be!)
 Ditàkemena dya buloba ne disànkà dya Dyulu;
 Dìna dya mushinga mukolè, (Dìna dya
 mushinga mukolè!) Éyi dya bupòle be!
 Ditàkemena dya buloba ne disànkà dya Dyulu.

¹¹⁰ Twìnyikààyaaku mitù yetù mpindyewu. Bitùùlùbitùùlù menemene, katùpù aci mwoyi's. Twìmbààyi cyàkàbìdì citùminyì aci.

Angàtà Dìna dya Yesù wèndè naadi, (Bwà
 cinyi?)
 Bu Ngabu ku butèyi bwònsò; (Pàdì Sàtaanà
 ùteeta bwà kukukwàta mu butèyi.)
 Pààkujìngà mateeciibwa ku nseke ne ku nseke
 yònsò, (Udi wenza cinyi?)
 Nungànà ànu Dìna dya Cijila adi...
 ("Bwalu Mukalenge ùdì kumpàlà kwànyi;
 ncyàkunyungishiibwakù to!")
 Dìna dya mushinga mukolè, (Dìna dya
 mushinga mukolè!) Éyi dya bupòle be!

Mwanèètù Neville.



MU BŪIKADI BŪENDÈ LUA62-0909E

(In His Presence)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumuŋu dilòòlò, mu matùkù 9 a ngondo wa citèemà, cidimu cyà 1962, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maaluu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org